


NIPURO N'OKOKHORELA

NITHANLIWE NI MULUKU

 Nrowe nikhale neemenleene okathi vakhani nuuramihaka miru sahu wira nivekele. Nto vano, nuurammeene miru, ni kinroromela wira mirima sahu sihuurama, nave, kaatthuna kisuwele akavi mu ohiy'ula antthuna wupuweliwa mmavekeloni, ya etthu y'omeekha? Mwaamutthuna ovenxa ntata, wira, "Muluku, mukivahe ohiy'ula ele emphavel'aka." Apwiya yooreeriheni.

² Tith'ihu a Wirimu, vano naattamelaka ni wiiveviha Ehice ela yuulupale ya mahala, mwaha wo waamini, hiyo ninnikela Mapuro ale iwe; weiwo Muluku, ni Malaikha, ni Makerupi, ni muttitthi wothene wa Wirimu othukumann'aya vamosa. Okhala wira Owo ohimnye wira khiivo hata ephera emmorela vathi Atithi Wirimu ehisuwenle. Vaatepa Awo osuwela va atthu imiya yuuramaly'aya miru saya, ni anoovekelani Nyuwo ni soovekela s'omeekha. Tithi, nwehe olumwenku woothoiwa ohiy'ula, maana hiyo n'atthu oothoiwa.

³ Ni kinnivekela, Muluku, okhala wira noothukumana va ni ninnoohimeeryani Nyuwo omwaamini wahu Muluku mukumi Yoole onaakhula mavekelo; nikhumme eriyari y'olumwenku w'atthu oohinnuwihwiwa, murima ni maaru, nookhuma wira nikhhalane makhalelo oovalaanihiwa, ni okhala nihimyaka owaaminini wahu Nyuwo. Ohiy'ula noovenxa matata, niiraka, "Hiyo noothoiwa." Muluku Ootthuneya, mmwaakhule khula mutthu soovekela saya.

⁴ Vano nto, Tithi, hiyo ninvekela wira Nyuwo munithotole ohiy'ula mwa Masu. Hiyo ninrwa va wira nittharuxiwe, wira niuwe saana, wira nisuwele moota w'okhala nihiku nla n'olelo; etthu yoolipelela, etthu yo wira. Maana, hiyo noosuwela wira Orwa w'Apwiya ori vakhiviru, nittharihaka ithoonyeryo sothene maprofeta yaahimny'aya. Ninnaattamela okathi, Pwiya, okathi ovuluxiwa woomalela anrowaaya ovahiwa an'Inyu. Muluku, munitthuniherye, khula mmosa, nikhale weiwo, Tithi. Ohikhale hata mmosa onihaleela. Mwaha wa yeeyo nikhalenly'ahu va, Pwiya. Hiyo ninnoophentani, ni nimphavela wiitthokiha mwaha w'okathi yoowo.

⁵ Mulavule ni hiyo, hiyo ninnivekela-tho, ohiy'ula. Ni mwaavonihe aretta. Aretta othene ni ooriipiwa murima ari mpaani mu, hiyo ninvekela wira Nyuwo mwaavonihe, Pwiya; ni vanci-enexa ale amphavela sa erooho. Hiyo ninvekela wira Nyuwo moopole minepa sirimenle. Mmusarihe khula mulipa-

oowaamini Eroho Yowarya. Ni muuluule okhaliha ikuru ni Owerya mw'an'inyu anaamini. Munivahe itthu iya, Tithi. Hiyo ninvekela voowaatta, okhala wira Nyuwo moonileela wira nivekeke, "nvekeleke soowaatta, nvekeleke itthu suulupale, sinci-ene," wira otteeliwa wahu murima omalele. Nto hiyo ninvekela seiyo mwa Nsina na Yesu Kristu. Amen.

Mukilathiki.

⁶ Vekeekhai kinnihelela nno okhala oreeriwa wuulupale ohiy'ula, otthikela-tho vaplataforma va, va exikola sekuntaariya ela, okumanana atthu ala ooreera murima athukumanne wira yiiwe Ehapari yooreera. Kininvekela Muluku omoriwa wawe ikharari wira akikhaliherye wooleelani Ekeekhai ntoko sinsuwel'aka Ekeekhai. Owo nlelo onniwerya otthuka eyano ya mutthu, siisaale Owo aawenry'awe otthuka eyaano ya kharamu. Vaakhanle wira kaamweererya ohimya etthu p'itthu eri yoovonyeya ni yoovirikana ni otthuna Wawe, mavekelo aka wa xariya-vo wira Owo atthuke eyano aka, wira kihihimye. Maana, vekeekhai, kintthuna kikhale Wirimu, yoomi; ni nkaakhalakhala kikhakala-wo, ni, ohiya sothene iyo, kaamukhala muhooleli oowootha, mutthu iirale etthu voowootha. Kiira vale, okhala wira nkinsuwela voovirikana. Apwiya yooreeriheni.

⁷ Vano, meelo voosiisu, wakhala otthuna wa Muluku, kintthuna kilavule mwah'ole, *Othelana Ni Omwalana*. Ni ninroromela wira munimoorwa, ni muruue ilaapi sanyu ni ipaphelo sanyu. Khaninrowa opisa, masi kaatthuna paahi o . . . Owo ti waari mwaha wa miyo otthikela wenna, toko, oIndiana, wira kaahoolaiheryani yeeyo. Nto kinimweehererya meelo voosiisu. Kaahiwerye meelo voosiisu, kinoowerya meelo ohiyu. Masi kinrowa weehererya meelo voosiisu, Apwiya yatthuna vale, olavula mwaha ene, inamuna piili so wupuwela. Nto Muluku anikhaliherye osuwela ele ekhanle Ekeekhai, osuwela paahi ele ekhanle Ekeekhai, wira niweryeke weetta mw'Ekeekhai ni moWaaryani. Hiyo . . .

⁸ Moosuwela, kaahikhalana mpatthani mmosa ooriipa. Owo khukiirela, owo khwira, "Munna Billy," owo khwira, "Miyo—miyo nkinthuna mukattiyamiho omurattihini." Owo khwira, "Kintthuna kikhalene ettikitti aka mmatatani. Nto epiitu yaruma vale, nkinthuna mukattiyamiho weiwo. Kihaavekela Apwiya, okathi munci-ene ovinre, yakhala etthu ehilonke, ekihiye kilokiherye naanaano va," khwira, "okhala wira onrowa okhala wooriipela ni w'ettheke yuulupale voosiis'uwo okathi ekalawa enrowaaya okhuma erowaka epantte ekina." Khwira, "Nkinthuna hata mukutakutho. Kintthuna kikhapelele sothene naanaano." Ti yeeyo ekhanlenly'ahu va, ophavela okhapelela mikutakutho sothene, wira niwerye owela okathi uwo.

⁹ Vano, nkinrowa olavula ni nyuwo okathi munci-enexa ohiy'ula, okhala wira nirina miteko miili meelo. Vano nto

kinookhuma naanaanoru, kirowaka nipuro nikina, kirowaka, miteko mikina-tho.

¹⁰ Masi, vano, muLiivuruni mwa Otumererya. Kintthuna kisome okhuma kapiitulu 16, iversiikulu tthaaru soopacerya, sa Otumererya 16:1 mpakha 3.

Muttittimihe mweeri wa Abibi, mwiraka niira na pasikha...APWIYA Muluku anyu: ...waari mweeri (wa neexexe) Abibi Apwiya Muluku anyu wookumihal'yayani we—wEjitu ohiyu.

Mwaavahaka mukuttho wa Pasikha APWIYA Muluku anyu, ipwittipwitthi ni inyompe, nipuro APWIYA Muluku anyu athanlaly'aya wira nikhale-wo nsina naya.

¹¹ Vano, mwah'aka ohiy'ula t'ula: *Nipuro N'okokhorela Nithanliwe Ni Muluku.*

Mwaweha vale, mweeri wa A-b-a-d...-b vo ti, enihimya, "Abril." Mweeri wa Abril p'ukathi awo yaakumihiwaaya.

Nto vano etthu yootikiniha okhala wira hiyo ohiy'ula, ntoko alipa-oomukokhorela Muluku, nihiku nla ninkhal'ahu, nto hiyo ninniphwanya miyuupuwelo sinci-ene soovirikana s'atthu. Ni saakhalakaru miyuupuwelo soovirikana mwaha w'etthu, sookhala sookoha soovirikana; ehaana okhala ekeekhai emosa wira yaakhule khula yookoha enikohiwa.

Vaakhanle wira kaamukoha, "Exeeni *ila*?"

"Ahe," yaamwiiriwa, "meesa."

"Ti ya xeeni?" Munnona?

¹² Vano, vo, mutthu mmosa aamwiira, "Kahiyo meesa. Eyo ethapwa." Ahe, eyo ethapwaa, masi nlelo meesa. Moone, ohaana okhala waakhula w'ekeekhai yeeyo.

Nto vaakhanle wira kaamukoha etthu p'itthu, ohaana okhala waakhula w'ekeekhai. Pooti okhala etthu yoolattana ni yeeyo; masi ehaana okhala ekeekhai, waakhula woolikana wa khula yookoha. Vano, tivo, khula yookoha enikhumelela mwa makhalelo ahu, ehaana okhala ekeekhai, waakhula w'ekeekhai woolikana.

¹³ Nto vano, olelo, hiyo ninniwa—ninniwa ohimmwa, atthu ahu anci-ene molumwenkuni olelo . . .

Kiry'aka misionaariyu, kiheetta mikwaha sinci-ene ilapo s'okhopela ni mulaponi, kookumanana itiini soowaatta soohiyana-hiyana, ntoko Buda, ni Emaka, ni Siiki, ni Jaini, ni sikina tho, sa itiini sa molumwenkuni. Vano nto nno Estadu Unidu ahu; ni ilapo sikina s'okhopela, kookumanana ikereja sahu sothene soovirikana, ntoko ikereja sahu sa miromolelo, opacerya Katolika yoopacerya y'oRooma, vano nto Ekereku, ni sikina, ni ma—maira oohiyana-hiyana, vano nto wa o . . .okathi

wothene wa miromolelo, wa miromolelo imiya thanu na xexe n'itthu sa miromolelo s'Eprustante.

Vano, khula emosa, vekeekhai, mwaamuwerya woona miyuupuwelo saya, ni nkikhanle waapwapwela. Khula mmosa onihimya wira awo t'ari ekeekhai, awo t'arina ekeekhai. Nto atthu aniira mpantta wa ikereja seiyo yaahaana waamini yeeyo, okhala wira awo aakhaliha ma—makiseryo aya, makiseryo aya Oohimala, vasulu va mwiixuttiho wa ekereja yeeyo. Ni ti soovirikana, emosa ni ekhw'aya, mpakha vanikhumelelih'aya sookoha imiya thanu na xexe n'itthu.

Tivo, sikhhalaka sookoha imiya thanu na xexe n'itthu soovirikana, ohaana okhala Waakhula woolikana. Ni kaatthuna wira hiyo ohiy'ula, ekhalaka wira nimphavela orowa Wirimu, ni okumana ni Pwiya'ahu Yesu Yoowo hiyo othene onimphent'ahu, kaatthuna kaavyaavye mwa Soolempwa wira kiphwanye yeeyo.

¹⁴ Vano, yakhala yookoha ya Bibilia, nto ohaana okhalana waakhula wa Bibilia. Khiyaakhanle okhumaka munikhuruni n'atthu, mwa opatthana khata, wala wa namusomiha khata, wala okhuma muromolelo khata. Yaahaana orwa voolikana ekhumaka mwa Yoolempwa, memmo nikhany'aya nipuro n'okumana na Muluku, n'okokhorela-vo. Nto vekeekhai, ory'ene Muluku, nookhala nipuro n'okumana nipuro nlo, vaavo Owo onkuman'awe.

¹⁵ Vano, hiyo ninniphwanya va wira mwa Otumererya va, wopaceryani, wira Moise aanitthikela ohimya Soolempwa, itthu owo aahimenryaawe; moota Owo aakumihaly'awe ni moonoo, muulupale wa ikuru, okhuma wEjitu, ni aakhalihaly'awe wopaceryani.

Awo yihaniwa “atthu a Muluku” mpakha awo okhuma wEjitu, vano nto yihaniwa “ekereja ya Muluku.” Okhala wira, ekereja t'enthukumana, wala, vekeekhai, *ekereja* enihimya “ale yihaneliwe okhuma,” ale yihaneliwe okhuma. Vano awo yaahikhuma wEjitu, wira akhale ekereja.

¹⁶ Vano Muluku aahaahimeerya, okathi awo...awo ahinatthi oteka empa y'okokhorela-mo ni sothene siiraly'aya, “Miyo kinoothanla nipuro n'okikokhorela Miyo, ni Miyo kinoothela Nsina Naka vaavo.” Nto nlo naari nipuro nimoso paahi Muluku aarowaawe okumana ni mutthu ti mutthu, naari noothanla Wawe Mwaneene. Owo oothanla nipuro Nawe. Ni vaavo Owo othanlaly'awe nipuro Nawe, oohela-vo Nsina Nawe. Eversiikulu 2 va ennihimeerya wira, “Owo aarowa ohela Nsina Nawe nipuro Owo aathanlaly'awe wira atthu emukokhoreleke Yoowo.” Vano, etthu ene t'ila, hiyo ninthuna niphwanye vatthu vari nipuro nenlo.

¹⁷ Ni miyuupuwelo imiya thanu na xexe n'itthu, ekhalaka wira ninnihya ohimya itiini sothene s'epakawu, n'ulavula etiini y'eKristu paahi. Yeeyo, kirinaaka moonelo mwaha w'apakawu,

ahiiso nkaarowa orowa wu n'ulavula ni yaawo. Masi, awo aavonya. oKristu ti etiini emosa paahi ekhanle y'ekeekhai, ti oKristu. Nto miyo kinihimya eyo vekeekhai kahi mwaha wa miyo okhala muKristu; okhala wira, kinnaamini wira eyo ti Ekeekhai. Ti etiini emosa paahi ekhanle yoolikana.

¹⁸ Kaahikhala vamahiye vaavo enaakakhanyiwa ekhavaloo yootteela khula iwoora xexe. Vaavo, Muhammad, namukuttho muulupale ni—ni mahooolela naanaanoru n'ukhuma Kristu, enihimmwa wira aari profeta, ni, nkinihoverya wira aari yoowo, naanaanoru emalakaruu axinna Makabewu. Masi okathi awo. . . Owo vakhwiyaawe. Owo aahimya wira aamuhimuwa axinte olumwenku wothene. Vano, khula iwoora soophiyaka xexe makwarta animwaakakhanyiwa, ni eniheliwa ekhavaloo yootteela vamahiye vawe. Awo ahaana, iyaakha ikonto piili, ewehereryaka wira onooihimuwa axinte olumwenku. Masi moone. . .

¹⁹ Nto mwamurowela Buda; Buda okhanle iyaakha imiya sinciene, iyaakha soophiyaka ikonto piili ni imiya tthaaru sivinre, muluku a o—a oJapawu. Vano siiso owo aari nafilosofiya, ethu ntoko Konfuusiyu, ni siiso.

Masi othene awo, wa. . . alipa-oopaceriha, ni siiso, othene aya akhwiye ni filosofiya aya, ni t'ovithiwa mmahiye.

Masi oKristu, yoowo okhalihwe ni Yesu Kristu, ari mahiye oohikhal'ethu. Owo t'ari Mutthu mmosa paahi otonko okhala mulaponi, khukhala khuhimya wira, "Kookhalana owerya w'oleva ekumi Aka ni w'okuxa-tho." Ni Owo ohiira. Vano Owo mukumii olelo.

Ni hiyo noosuwela wira Owo mukumii, okhala wira Owo ori ni hiyo ni onniisoniherya Mwaneene ni ithoonyeryo s'erutthu ni mitikiniho, Owo aalahenry'awe wira aamwiira wira ooniherye. Okhalaka wira, ntoko Nlumi na Mooro naaweettihaly'aya aana a Isarayeli eviraka mothakoni, nri ni hiyo olelo, hata noohiyerya okumihiwa elatarato Aya; nipakaka ithoonyeryo ni mitikiniho Owo aahimaly'awe wira Owo aamwiira mahiku ala, noonaka Masu othene Owo aahimaly'awe wooniheriwa mahiku ala. Tivo, olumwenku mukina w'epakawu ori ota. Ti oKristu!

²⁰ Vano, okhalaka wira siri sookoha imiya thanu na xexe n'itthu sa nipuro Muluku onkuman'awe-vo, "Owo onkumana ni Mmetotista, wala Owo onkumana wa Patista, ni Owo onkumana mwa *ela*, ni *ele*, ni *ekina*." Vano, yookhala yookoha vo, tivo khula mmosa ohaana ophavela woopowa wawe ni wiiyeviha ni woova.

Masi ohiy'ula kintthuna keehererye ophwanya, ni wooniherya mwa Soolempwa, vatthu vari nipuro noolikana vaavo Muluku onkuman'awe ni onkokhorel'awe n'atthu. Nto, yakhala yeeyo, nlo ti nipuro nimosaa paahi Owo okhanly'awe okumanaka.

²¹ Vano, hiyo nikunxe yoosoma ela mwa Otumererya. Nlo nuulumo n'Ekereku nenlo nrina soohimya sootakanxana, wala, nnihimya, "ikano piili." Nuulumo n'Ekereku, *Otumererya*, nnihimya "ikano piili soovirikana."

Ni ti yeeyo Muluku orin'awe, ikano piili soovirikana. Nto emosa ti ekano ya mookhwaani, nto ekina ti ekano y'Ekumi. Muluku orina ikano piili. Omutthara Yoowo, ni omurumeela Yoowo ni omukokhorela Yoowo, enkhala Ekumi; okhootta Yeeyo onkhala okhwa. Siri ikano piili mwa Muluku.

²² Vano, emosa wa ikano iyo saahisu-...saahisuwelihiwa molumwenkuni, oMwaako Sinai. Muluku aahinvaha ikano Moise ni Isarayeli. Kahi wira ikano saamuwerya waakhaliherya, masi ikano paahi saawooniherya paahi wira yaari anatampii. Mpakha okathi uwo, awo khayaasuwela exeeni yaari etampi, mpakha awo okhalana ikano. Khivanweryaneya okhala ikano sibirina ehukumu. Ekano khenkhala ekano, ehirina ehukumu. Vano, tivo, "Ohonona ikano etampii, ni nlevelo na etampi okhwa." Vano tivo, mpakha Muluku okhaliha ikano, khiwaakhanle ottheka awo yaasuwelaaya.

Yaahikhale ekano va enihimya wira muheetteke ovikana ikilomo miloko miraru ni piili, vano nto mwaamuwerya ovikana ikilomo miloko miraru ni piili khula ewoora. Masi yakhala ekano enihimya wira muhiireke, nto yookhala ekano ni ehukumu ottuli waya.

²³ Vano, okhwa, ikano sa mookhwaani, saari sooruma saavahiwe oMwaako Sinai, saamuhimenrye mutthu wira aari natampi. Nto, ohonona ikano sa Muluku, owo aanikhwa. Masi kuuvo woopowa mwa ikano. E...Saari mupiliisa paahi aamuhela mutthu mukhatteya; khiyaarina hat'etthu yo omukumihana-mo.

Masi nto Owo aahivaha ikano sikina, waari oMwaako Kalvario, weiwo etampi yaalikeliswaaya mwa Yesu Kristu, nto weiwo ehukumu aya yaahilinvwa. Nto kahi ni... Woohikhala ikano, "masi ni mahala munnoopoliwa," ni mahala a Muluku, muhina mwa otthommwa wa osuwela khalayi ene wa Muluku wa okhala wanyu.

²⁴ Vano ninnoona ikano iya piili, Otumererya, olavulaka ikano piili. Saahikhala ikano piili. Emosa yaari ekano ya okhwa, nto ekina yaari ekano y'Ekumi.

²⁵ Waahikhala-tho waataana miili yaavahiwe atthu. Ninrowa olavula seiyo voosiisu.

Emosa aya aavahiwe Atamu mwa yoophaveleya, "mwairaru *ila* khuhiira *ele*," masi ikano iyo saahihoniwa. Atamu, Hawa aahihonona eyo, omatta wEdeni.

Vano Muluku khupaka waataana wa neili, khunvaha yoowo Abrahamu, nto ekano eyo yaari voohithuneya etthu. "Kahi

ile mwiiraly'anyu wala munrowaanyu wira;" Owo iirale, "Miyo kiihira." Awo mahalaa. Eyo ti ekano ya Ekumi. Muluku aamwiirenle yeeyo Abrahamu ni Osuulu awe nuumala owo, eyo ti wi, Osuulu wothene w'Abrahamu.

Ntoko Bibilia sihimaly'awe, "Isarayeli othene onimoopowa," masi eyo khenihimya aYuta. Ntoko Paulo sihimaly'awe, "Isarayeli ule okhanle mpuwa, wala Isarayeli ota." "Ota," ntoko silavunly'ahu ohiyu ovinre, yaari aana a Isakhi, ni ekhapa. Masi ikano sa Muluku saari mwa Kristu, yoowo aari Osuulu w'Omwele w'Abrahamu, wira, "ni mahala Isarayeli othene onimoopowa." Eyo ti wi, "Othene ari mwa Kristu animoopowa," othene, waataana wa neili wa Muluku. Masi itthu iya sothene saari iruku sa Kristu.

²⁶ Vano nkawehani eversiikulu 2. Eversiikulu 2 va mwa Otumererya 16, "Okokhorela nipuro Miyo nithanlaly'aka." Vano muhaana omukokhorela Muluku, Owo ohimye wira, "Nipuro Miyo nithanlaly'aka," kahi mutthu mukina othanlaly'awe, masi, "ele Miyo ethanlaly'aka."

Vano, vakhala wira Muluku oothanla nipuro, ennithuna hiyo nisuwele etthu Owo ohimaly'awe wa yeeyo. Nto ti yayi? Kintthuna kiphwanye, okhala wira, vekeekhai, kintthuna omukokhorela Yoowo.

Hiyo othene nri va, ohiy'ula, wira nimukokhorele Yoowo. Nimphwanyaneya va ohiy'ula, ntoko Mmetotista, muPatista, muKatolika, Namoono a Yehova, Siyensiya a oKristu, ni othene, masi hiyo othene nimphavela etthu.

Nintthuna nisuwele Ekeekhai. Bibilia ohimye wira, "Munoosuwela Ekeekhai, vano Ekeekhai yeeyo animootaphulani."

Mutthu, khamukhanle osuwelaka eniir'anyu, khamunsuwela moota wo wira mpakha musuwele moota wo wira; khamunsuwela etthu yo wira mpakha musuwele moota wo wira, kiireke. Muhaana osuwela etthu muniir'anyu ni moota wo wira.

²⁷ Ela eninooniherya wira Muluku ookhalana nipuro nimoso n'okumana-vo w'alipa-oomukokhorela Awe, nipuro nimoso khata. Nipuro nenlo, paahi, Muluku onnikumana n'alipa oomukokhorela Awe.

²⁸ Vano, nave-tho, nipuro Owo aathanlenly'awe alipa-oomukokhorela Awe, Owo ohimye wira aamukhalaha-vo Nsina Nawe. Vano nrowe niphavele niphwanye, mwa Soolempwa, vatthu nri nipuro nlo. Vekeekhai, vakhala wira Muluku ohimye wira Owo aamuhela Nsina Nawe nipuro nenla vaavo Owo aathanlaly'awe wira akumaneke n'atthu ni okokhorela ni yaawo...wala awo omukokhorela Yoowo, kiireke, wira nimphwanyaneya nipuro nlo mBibiliani, maana naari na okathi wothene.

²⁹ Nto Muluku muulupale ohinrukunuwa khokhanle orukunuwaka. Mutthu onnirukunuwa. Masi munoowerya ororomeliha ekumi anyu etthu p'itthu Muluku otonko awe ohimya khula okathi, okhala wira Ekeekhahi. Eyo Ekeekhahi. Okhala wira, eyo ti etthu emosa paahi kikhany'aka okhalanaka nrromelo, ti Bibilia. Okhala wira, nuulumo na mutthu ninoovonyeya, masi Muluku ti muupalexaxa.

Eyaakh'ela kaahaana osuwelaxa ovikana kaasuwel'aka mwaisana. Nyuwo mwaahaana, nave, khula nihiku. Hiyo ninnimala, tivo nimphwanyaahu osuwela.

Masi Muluku t'ohimala. Owo t'ohimala. Ni, ory'ene oohimala, Owo khokhanle ophwanyaka osuwela. Owo t'olikana, opacerya wene. Khula etthunelo ehaana okhala yoolikana ene.

³⁰ Nto enamuna Muluku iiraly'awe emaara emosa, Owo ohaana wira siiso kweekwe, ahiiso Owo iirale voohiloka okathi Owo iiraly'awe emaara yoopacerya. Mutthu akhalakhala arwaaka wa Muluku wira oopowe, vasulu va mulipiheryo Owo omukupalann'awe, ohaana okupaliwa ni mulipiheryo yoowo mmosaru khula okathi. Ti yeeyo. Mutthu arwaaru wa Muluku mwaha wa ovoniha wa Muluku, nto Muluku khumukupali vasulu va mulipiheryo khata; mutthu ontharelana onrwa, Owo ohaana omukupali enamuna emosaru, ahiiso Owo aahiira voohiloka okathi aamukupanly'awe mutthu oopacerya. Muluku ookhalaha mulipiheryo Owo aarowaawe okumana-vo ni mutthu. Owo oopaka mulipiheryo wa etthu aarowaawe wira, moota aarowaawe wira, nto eyo yaari mwa ephome ya mwaapwittipwitthi a mukuttho omatta wEdeni. Muluku khonatoko, hata okathi, khonarukunxeke yeeyo.

³¹ Owo aahitthokiha moota aarowaawe omoopola mutthu. Hiyo nineererya omusomiha mutthu moota w'okela mwa yeeyo; hiyo nineererya omukeliha muxikola, nineererya omusomiha, nineererya omutthokiha, nineererya wira itthu iya sothene sikina; waaruuha, waatatha, waapatisa, khula enamuna ekina ekhanle, waaruuha ni iwarakha. Masi nlelo enkhalaxa, etthu emosaru, Muluku onkumana ni mutthu vathi v'Ephome emwaraxiwe ya Mwaapwittipwitthi. Ephome yaari enamuna ya Muluku wopaceryani, ni Ephome t'ekhanle enamuna ya Muluku ohiy'ula. Ti yooreera olapa ni itthu iya sothene sikina, masi woopowa onrwa ni Ephome paahi. Ephome ti enamuna emosa paahi Muluku othanlaly'awe wira amoopole mutthu, ni Owo khokhanle orukunxaka.

³² Ni Yobi yaari etthu emosaru yeeyo. Owo aanisuwela wira aari naxariya, okhala wira aahivaha mu—mukuttho Muluku aatthunaly'awe wa yoowo.

³³ Vano, nrowe niphavele vano noone nipuro xeeni nla, ni nipuro Owo ohenly'awe-vo Nsina Nawe. Nihaana osuwela vatthu Owo ohenly'awe-vo Nsina Nawe. Vano, hiyo nasuwelaru

nle nikhhanle Nsina na Muluku ni vatthu Owo ohenly'awe-vo, nto ninookhalana nipuro n'okokhorela-vo nimalakaru osuwela yeeyo.

Itthu iya sothene, vekeekhai, saari iruku sa itthu s'ohoolo. Ikano sothene saari iruku sa itthu s'ohoolo.

³⁴ Siiso ntoko, mweeri ory'aya eruku ya nsuwa. Owo onrumeela naahikhale nsuwa, siiso ntoko Ekereja ery'aya wira erumeele aahikhale M-w-a-a-n-a a Muluku. Aahikhale Mwaana, Waarya mukhaani, Ekereja, alipa-oowaamini, annimurumeela Muluku ni annivaha Waarya aahikhale vale Mwaana. Masi nsuwa naphattuwa vale, khamunoona-tho mweeri, okhala wira w'otupweela. Khonthuna-tho waarya waya, okhala wira onkhalana waarya waya vaneili, wa nsuwa. Vano, ntoko iya ni mwaara, nsuwa ni mweeri siry'aya, Ekereja ni Kristu.

³⁵ Vano ninniphwanya, wira, itthu iya ti iruku sa Kristu. Khula mukuttho, niira, ni itthu sothene mwa Waataana Wa Khalayi, saari iruku sa Kristu; siiso ntoko eruku enkhumel'aya vathi. Vano va ti vatthu ninrowaahu ophwanya nipuro n'ekeekhai n'okokhorela-vo, otthikela ottuli nno mwa Waataana Wa Khalayi weiwo naavaheriw'aya ni woona iye saari itthu iya.

³⁶ Vano, eruku yaakhumelaka vathi, vanooweryaneya ohimya vakhala wira mulopwana, muthiyana, wala enama, wala enakhaleru etthu p'itthu, okhala wira ennikhumeliha eruku vathi. Nto eruku ilo yaavukuwaka, eruku ery'ene nekatiiyu; ni khivakhanle okhalaka nekatiiyu ehikhanle positiivu. Tivo, positiivu yaattamelaka nekatiiyu, nekatiiyu enoottiyeleliwa ni positiivu. Eruku ni po—ni positiivu sinkhala vamosa, ni ti yeeyo nto enkhaliha positiivu.

Ni vakhala wira “itthu sothene sa khalayi,” Bibilia oohimya, “mwa Waataana Wa Khalayi, saari iruku sa itthu s'ohoolo,” vano tivo Kristu aari eruku ya itthu s'ohoolo.

³⁷ Tivo hiyo ninniwerya woona, ni ithoonyeryo sa Waataana Wa Khalayi, vaavo Owo othanlaly'awe ohela Nsina Nawe, ni o...mwa vano. Vano, ntoko ery'aya eruku, enikela vathi, miyo kiirale, ti nekatiiyu, ntoko etoonyeryo. Tivo hiyo, alipa-okokhorela, nave-tho ninniwerya woona iruku sa Waataana Wa Khalayi orimeeleleya munekatiivu mwa Naanaano.

³⁸ Vano, maira othene, mahiku oowitthyuwa, itapernakulu sothene, matoro othene, itthu sothene mutapernakulu, itthu sothene saamuthoonyerya Kristu. Mikuttho sothene, ikano sothene, itthu sothene saari mwa nlikanyiho wa Kristu. Hiyo noosoma iyo, imaara sinci-ene, vaava otapernakulu.

Vano hiyo ninnoona, mwa seiya, wira khula eyaaminelo, ekereja, ni muromolelo sinihiiwa ottuli saana. Khasikhanle hata mootthimakani, nnakhala. Khula eyaaminelo, khula ekereja, khula muromolelo, ti woohiwa voomalela. Khokhanle opuro wa seiyo nnakhala.

³⁹ Khiivo enthoonyeriwa mwa Waataana Wa Khalayi, wala nipuro pi nipuro mBibiliani, ya ekereja, masi wiiwanana wookhanyereriwa wa namukattha a oBabeli. Eyo ti etthu emosa enthoonyerya wiiwanana. Okhala wira, yaari ni Nimurode, mutthu mmosa ootakhala aaronwe khukhanyererya ilapo sothene sikhaani orwa nipuro nimosa ni namukatth'ola muulupale. Waari okokhorela wa etiini, vekeekhai, masi woohitthokeleliwa mwa Masu a Muluku. Tivo ti vaavo vanoonya etiini ya muromolelo othoonyeriwa waya, namukattha a oBabeli, mwa Waataana Wa Khalayi. Yeeyo, etiini ila vekeekhai yaari etiini, masi kahi etiini ya Masu a Muluku.

⁴⁰ Muluku khotanlale ohela Nsina Nawe mwa hata muromolelo. Kintthuna Yoolempwa emosa ya yeeyo, yakhala vale. Koosuwela wira enihimmwa wira Owo oohela, masi Owo khohenle. Owo khokhanle ohelaka Nsina Nawe mapuro manciene, okhala wira Owo aahimnye wira ohenle Nsina Nawe nipuro nimosa. Nto, nipuro nimosa nlo, khula mmosa wa muromolelo ahu onthuna ohimyeke wira awo t'akhanle nipuro nene, masi ti yoovirikana.

Masi Owo ohenle yayi Nsina Nawe?

⁴¹ Vano, nto, Owo, Nsina Nawe ti nvi, toko? Nihaana o (Nsina) ophwanya nle nikhanelle Nsina na Muluku nihinatthi ophwanya exeeni Owo onihel'awe voopuroni.

Vano, ninniphwanya wira Owo khaareerane ithoonyeryo. Owo iihaniwa e. . . Owo iihaniwa "Tithi," ekhanle ethoonyeryo. Ni Owo iihaniwa "Mwaana," ekhanle ethoonyeryo. Owo iihaniwa "Eroho Yowarya," ekhanle ethoonyeryo. Owo iihaniwa "Ethutu ya Saroni," ekhanle ethoonyeryo. "Ekhekowa ya Mukhatoni," ethoonyeryo, "Ettheneeri y'Oxaka." "Yehovayire, Yehova-rafa," masina mathanu na maili, oohiyana-hiyana, ootakanxiwa a nvuluxo, nto othene awo yaari ithoonyeryo. Khanivo hata nimosa naari nsina.

Masi Owo ohaana Nsina.

⁴² Okathi Owo okumann'awe ni Moise, Owo khaarina Nsina nlelo, nto Owo aahimuleela Moise, "MIYO T'ULE KINKHALA." Ni naamoonaka Yesu elapo ya vathi, alavulaka mwa aHeperi kapiitulu 6. . . Kileveleliwe, Yohani Oowaarya kapiitulu 6. Owo irale, "MIYO T'ULE KINKHALA."

Awo khwira, "Vano, Nyuwo mwa Mutthu muhirina hata iyaakha miloko mithanu, nto muniira wira 'moomoona Abrahamu'?"

⁴³ Owo khwira, "Abrahamu ahinatthi okhala, MIYO KOOKHALA." Nto "MIYO KOOKHALA" aari Yoole, mwiiwa waavarela, Nlumi na Mooro naari vamwiiwani waavarela wu mahiku a Moise, ole "MIYO T'ULE KINKHALA."

44 Nto vano ninniphwanya wira Yesu oohimya, nave-tho, “Miyo kiruule mwa Nsina n’Atithi Aka, nto nyuwo khamukaakhenle.” Vano, Nsina n’Atithi nihaana okhala Yesu. Ti yeeyo. Nsina n’Atithi ti Yesu, ’okhala wira Yesu ohimnye siiso. “Miyo kinkuxa Nsina n’Atithi Aka. Miyo kinrwa mwa Nsina n’Atithi Aka, nto nyuwo khumukaakhenle.” Vano, Nsina Nawe naari Yesu.

Ni Kapriyele aamwiihanne Yoowo Yesu, maprofeta yaamwiihanne Yoowo Yesu, ni Owo vekeekhai aari Yesu. Owo ahinatthi oyariwa, hata profeta oowaarya iihanne Nsina Nawe *Emanuweli*, yoowo okhanle, “Muluku ni hiyo.” Nto, “Muluku iisoonihenrye mw’erutthuni, wira attipihe itampi s’atthu,” nto, airaka siiso, Owo aavahiwe Nsina na Yesu. Tivo, Yesu ti Nsina.

Nto Nsina naaheliwe mwa Mutthu; kahi ekereja, kahi muromolelo, kahi eyaaminelo, masi Mutthu! Owo aathanlale ohela Nsina Nawe mwa Yesu Kristu. Vano hiyo ninniphwanya wira nto Owo onikhala nipuro n’omukokhorela-vo Muluku, vaavo munimukokhorel’anyu Yoowo.

45 Owo hata ahinatthi oyariwa, Nsina Nawe niihaniwe Yesu. Yaari etthu yuulupalex, yaahimeeriwaaya ame Awe ni Nlaikha Kapriyele, wira Nsina Nawe aarowa wiihaniwa “Yesu, Mwaana a Muluku,” yeeyo Owo aary’awe.

46 Vo nookhalana, nto. Ti nenla, paahi. Ti nenla, na Yoowo paahi, Nipuro n’okokhorela nithanliwe ni Muluku. Nipuro na Muluku, nithanliwe. Muluku oothanla okumana ni mutthu; khawaari mukereja, kahi mmuromoleloni, kahi muhina mwa eyaaminelo, masi mwa Kristu. Nlo ti nipuro nimoso paahi Muluku onrowaawe okumana ni mutthu, ni owo onwery’awe omukokhorela Muluku, ti mwa Kristu. Nlo ti nipuro nimoso paahi. Khivancala wira mwa Mmetotista, muPatista, muKatolika, Prustante, etthu p’itthu mukhanly’anyu, nri nipuro nimoso paahi mukhanly’anyu omukokhorelaka Muluku voolikana, ti mwa Kristu.

aRooma 8:1, iirale, “Khiivo ehukhumu vano w’ale ari mwa Kristu Yesu, ahineetta ettharaka itthu s’erutthu, masi sa Eroho.” Eyo ti Ehapari yooereera.

47 Ninoowerya ohiiwanana mwa iyaaminelo. Ninoowerya ohiiwanana mwa iyuupuwelelo soopakiwa ni mutthu. Nyuwo pooti orowa ekereja emosa Metotista, muhaana okhala Mmetotista; Patista, muPatista; Katolika, muKatolika. Masi mwamalaru opatisiwa mwa Kristu, khukhala mutthu a Erutthu Awe, khasivo hata ivirikanelo. Ixiri s’eriyari s’ekawanyeyelo sinoophomowa nto nyuwo munootaphuwa, okhala wira muri mwa Kristu Yesu. Ni mummukokhorela Muluku mw’Eroho ni mw’Ekeekhai mwakhalaru mwa Kristu Yesu. Ti etthunelo ya Muluku wira nyuwo mmukokhoreleke Yoowo mwa Kristu Yesu.

⁴⁸ Vano, khuuvo hata muromolelo wa ekereja okhanle ohimyaka yeela, khiivo hata emosa ekhanle ohimyaka ele. Xeeni nyuwo ohoovaka ohimya itthu iyo? Wira etthu ntoko eyo yaamukhala erooho ya nwanani a Kristu, okumiha mwa Kristu; okumiha mwa Yoowo. Khivanweryaneya wira yeeyo. Kristu ti nipuro nimosa paahi Muluku onkuman'awe n'alipa-ookokhorela.

⁴⁹ Awo aniira, olelo. Aakhala atthu anikileela. Mulopwana mmosa aahikilikarela woohikhala khalayi, oBeaumont, Texas. Owo khwira, "Mwenye Branham, nsina nanyu naahikhaleru muliivuruni mwaha n'okereja, khamunwerya orowa Wirimu." Mwaamukhalakhala muupuwelaka yeeyo? Muhaamini etthu ene ntoko eyo. Awo anoona wira muhaana wira mpantta wa ekereja eyo ahiiso khamunrowa Wirimu. Ti yoovonyeya. Waamini yeeyo, ti owanani wa Kristu. Kinoohimya ela: mwaaminikiru erooho ntoko eyo, moopweteya. Eyo ethoonyeryo yooreera wira moopweteya, okhala wira onkhala okumiha mwa etthu Muluku iiraly'awe. Muluku khonahелеke Nsina Nawe mukereja. Owo ohenle Nenlo mwa Mwan'Awе, Kristu Yesu, okathi Owo ni Mwan'Awе yaakhanlans'aya Mmosaru. Nlo ti nipuro nooloka n'okokhorela-vo. Khasivo milipiheryo mikina sikhalihiwe, hata mwala mukina.

Mwa Kristu, Mwala woolipa, kinoolipa;
Itthaya sikina mithaaka sinkomowa.

Miromolelo sinoonyaanyeya simore, ilapo sinoomalalama, masi Owo onookhala voohimala. Khanivo hata nipuro nikina mutthu okhanly'awe ophwanyaka, wira amukokhorele Muluku, Muluku onrowaawe olavula n'uwo, hata nipuro woohikhala mwa Kristu Yesu. Nlo ti nipuro nimosa paahi, nipuro nimosa paahi Muluku othanlaly'awe wira ahele Nsina Nawe, ni nipuro nimosa paahi Owo onkuman'awe ni mutthu, wira akokhorele. Nyuwo munoopweteya, waamini etthu p'itthu ekina.

⁵⁰ Nwehe, maira othene mathanu na maili a aYuta yaapakiwa nipuro nimosaru. Awo khanapakeke niira nimosa *nno* na Metotista, vano nimosa *nno* na Patista, nimosa *iwe* na Prespiteriyaano, nimosa *nno* na Katolika, vano nimosa na Prustante. Maira othene mathanu na maili yaapakiwa nipuro nimosaru.

⁵¹ Eyo ethoonyeryo yooreera saana va. Hiyo ninoomalaru osoma Okathi Mithanu na Miili wa Ekereja, erowaka wooniherya wira Muluku onikhaliha Okathi wothene Mithanu na Miili muhina mwa Masu, maana khula okathi wa ekereja okumihenrye epantte ya Masu, ni okathi sikumihenry'aya nto awo yaahona Waarya.

Voolikana n'atthu yaapacenrye ottemulela opatisa ni Nsina na Yesu. Awo yiirale exeenii? Awo yaapanke muromolelo mwa yeeyo, vano owo khukhwa vaavo vene. Nto Muluku khuthaama

naanaanoru amurowelaka mutthu mukina. Owo khonrowa okhala mwa emosa wa iyaaminelo iya ni makano. Owo khorina naata ni yeeyo. Khiivo hat'etthu yoononeya ya Muluku. Masu a Muluku t'owaarya, oohihoneya. Kristu ti nipuro n'eriyari na Muluku na okokhorela. Owo ti Muluku.

⁵² Maira othene mathanu na maili yaahaana opakiwa nipuro nimosa nenla. Khivaakhanle opakiwaka niira nipuro pi nipuro nikina. Masi awo mathanu na maili, mapuro . . . Maira mathanu na maili a eyaakha yaahaana opakiwa nipuro nimosa. Tivo, Okathi Mithanu na Miili wa Ekereja waahaana okhuma nipuro nimosa nenle, aari Kristu alavulaka mwa Okathi wothene Mithanu na Miili wa Ekereja. Eyo ekeekhai yoolikana. Ethoonyeryo, ya Okathi Mithanu na Miili wa Ekereja, masi awo apanke miromolelo mwa yeeyo.

⁵³ Vano nrowe niwehe ethoonyeryo ekina niry'ene vaava, eyo ti wi, ethoonyeryo ya pasikha, yaari eruku ya Yesu. Ninniweha va mukuttho w'ephome, mwa okhwa. Mukuttho w'ephome naari nipuro naari eruku ya Kristu. Muromolelo onniwerya okhuma ephome; mwaamuwerya wuupuwelela ekereja ekhumaka ephome, muromolelo okhumaka ephome? Vekeekhai nnari. Yaatthuniye ephome, okhuma ephome mw'ekumini. Nto, ephome, va Yesu onoorwa mwa mwaapwittipwitthi. Mwaapwittipwitthi aari ethoonyeryo ya Kristu, ni aari eruku ya Kristu, okhala wira Owo aari "Mwaapwittipwitthi a Muluku," Yohani aamoniheny'awe, "onttipiha s'ottheka s'atthu." Ninnimuphwanya Yesu akhumelelaka, va mwa Okhuma kapiitulu 12.

⁵⁴ Nwehe, naari nipuro nimosa paahi okhwa wahaawery'aya ophiya-vo. Okathi okhwa waahalel'aya ophiya mulaponi, naahaana okhala nipuro nimosa; othene yahaakhala vathi va nenla yaanikhwa. Nipuro nimosa paahi! Vano, khayaahimya wira yaari empa; masi naahikhala nipuro nimosa, ti vaavo mwaapwittipwitthi iiviwaawe. Vaavo vaari ephome ya mwaapwittipwitthi, nlaikha na mookhwaani nahaawery'aya ophiya-vo, okhala wira naari nipuro nimosa Muluku aaheny'awe-vo Nsina Nawe. Nto mwaapwittipwitthi uwo aavahiwe nsina wu wopaceryani, mwaapwittipwitthi. Nwehe, naari nipuro nimosa nlo nahaawery'aya ophiya-vo.

⁵⁵ Nto vano etthu emosaru olelo. Nri nipuro nimosa paahi okhwa wa erooho ohinwery'aya ophiya-vo, awo ti Masu. Okhwa khonwerya ophwanya Masu, okhala wira Awo Masu makumi a Muluku.

Masi mwaahelaka iyaaminelo Memmo, Masu anookhuma Mmansaya. Awo anoovalaana ntoko maasi ni makhura. Khamunwerya otakanxa vamosa. Tivo, moone, eyaaminelo yarwaa mmuromoleloni, awo othene anoorowa ettharaka eyaaminelo; vano Masu anoovolola, nto anoorowa ohoolo

ni mutthu mukina ni wuncererya Yaawo tho. Anookuxa ekakhelo, okathi Awo anrowaaya okhuma okhalihiwa naxariya, oreerihiwa, opatiiso wa Eroho Yowarya, ni erowaka mpakha muhina mw'Enuku! Munnoona ephiro Muluku onyakenly'awemo? Aruuhaka Nsina Nawe, okathi wothene, enamuna emosaru tu, okhala wira Owo ti Masu.

Nwehe, Awo khankhwa. Masu a Ekumi khankhwa.

⁵⁶ Nwehe moota ereeraly'aya, vano. Nlaikha na mookhwaani khanaakhoottihiwe waaphwanya atthu oosuwela aalupale a wEjitu. Nlo khanaakhoottihiwe ophierya ilapo saya sooreerihiwa, mampa aya maalupale, mafarawo aya. Wala, anamukuttho a mulaponi, nlaikha khanaakhoottihiwe ophierya. Nlo naaniwerya ophwanya khula empa, khula nipuro, khula mutthu, masi khanaawerya ophiya vatthu aari mwaapwittipwitthi.

Okhwa khunwerya ophiya vatthu vamphwanyaneya nipuro nla nivaheriwe ni Muluku, nto nlo nimphwanyaneya mwa Mwaapwittipwitthi.

⁵⁷ Nwehe, hata khayaari e...nlo naahikhoottihiwa omphiyerya Isarayeli wala anamukuttho aya aHeperi, ni, wala hata mmosa wa miromolelo saya. Othene aya yaahaana okhala nipuro naathanliwe, naavaheriwe ni Muluku, ahiiso okhwa waamuphiya.

⁵⁸ Ekereja, khula nipuro mury'anyu, muniir'anyu mpantta, wa miyo khivanvirikana. Masi, yookhala etthu emosa murin'anyu osuwela, muhaana okhala mwa Kristu ahiiso muhookhwa. Khamunwerya okhala mukumi ota wa Yoowo. Ekerej'anyu pooti okhala saana, ntoko empa; opatthana wanyu pooti okhala saana, ntoko mutthu. Masi mwaakhoottaka Erutthu, Epheme, Masu a Yesu Kristu, muhookhwa okathi ene yoowo muniir'anyu siiso. Ti nipuro n'okokhorela nithanliwe ni Muluku. Ti vaavo nri Nsina Nawe, vekeekhai. Ti vaavo Owo othanlaly'awe wira ahele-vo Nsina Nawe; kahi mukereja, masi mwa Mwaana, Yesu Kristu.

⁵⁹ Nwehe, olipa waakhala paahi nipuro n'othanla Wawe, mwa mwaapwittipwitthi Awe, ni mwa nsina na mwaapwittipwitthi.

⁶⁰ Nwehe, aakhala mwaapwittipwitthi "oolopwana", oolopwana, kahi oothiyana. Kahi ekereja, eyo; masi Nsina Nawe mulopwana, kahi nsina nawe muthiyana. Vaavo Owo aarowaawe okumana n'atthu khawaari mwa nsina nawe muthiyana, masi mwa Nsina Nawe, Owo, Mwaapwittipwitthi!

⁶¹ Vano hiyo niniira, "Ekereja, yuulupale, ekereja yoowerya, eyo ehiira *ela* ni eyo ehiira *ele*. Eyo yoovira muthekuni suulupale. Hiyo nihincerereya mwa atthu. Hiyo n'alupale mwa mamaru. Hiyo na ekereja yoowerya. Eyo etthu yuulupale."

Masi Muluku khonahimyeke hat'etthu ya yeeyo. Owo ohimye, "Owo." "Owo," ti nipuro n'okumana-vo,

Mwaapwittipwitthi, kahi ekereja. Kahi nsina nawe muthiyana, masi Nsina Nawe mulopwana. Owo khohenle nsina nawe muthiyana hata nipuro. Owo ohenle Nsina Nawe mwa “Owo”!

Mwaha wa yeeyo, “Sothene nihaana wira, ni moolumo hata ni miteko, nihaana wira sothene mu Nsina na Yesu Kristu.” Naavekelaka, nihaana ovekela mu Nsina na Yesu. Nakhalana s’oveka, nihaana oveka mu Nsina na Yesu. Neettaka, nihaana weetta mu Nsina na Yesu. Naavaanelaka, nivaaneleke mu Nsina na Yesu. Naapatisaka, nihaana opatisa mu Nsina na Yesu Kristu. Okhala wira, “Sothene siniir’ahu ni moolumo hata ni miteko, niireke mu Nsina na Yesu Kristu.”

⁶² Mutthu mmosa aahikiirela emaara emosa, nivaanyihanaka yeeyo, owo khwira, “Munna Branham, amwaar’aka, miyo nki...” Owo khwira, “Awo, nsina naya t’a *Lexe ni lexe*.” Owo murumeyii, siiso okilanthene vaava naanaano va. Nto owo khwira, “Amwaar’aka,” khwira, “awo arina nsina naka.” Kinimwiira Jones, okhala wira khanaari Jones. Owo khwira, “Vano, awo kharina ovenya khula voosiisu, okuxa nvelo ni wira, ‘Vano miyo kinvela vathi mu nsina na Jones, ni kinrapihia iphace mwa nsina na Jones, ni kinttottha ikuwo mu nsina na Jones.’” Owo khwira, “Kinoona wira khivantthuneya oromola hata nsina nakhala.”

Miyo khwira, “Kinoona wira nihaana oromoliwa.” Ti yeeyo.

Nto owo khwira, “Ahe, mwaha wa xeeni? Awo kharina wira. Sothene awo siniir’aya ti mu nsina na Jones, opacerya wene.”

⁶³ Miyo khwira, “Masi nyuwo khamukhumenle ota muramphani khwaakuxa, khwira, ‘Nrowe, Jones.’ Awo yaahaana okhala, toko, ni niira, niira n’othelana, ‘Jones.’ Yaahikhale siiso, nyuwo munkhala m’oraruwani. Ni nyuwo mwapatishiwa enamuna ekina woohikhala mu Nsina na Yesu Kristu, opatiiso w’ohononiwa, yoowo ohimphwanyaneya mBibiliani.”

Vano, “Eniir’anyu ni moolumo ni ni miteko, mwiireke sothene mu Nsina na Yesu,” nuumala yeeyo, ele eniiriwa. Masi yoopacerya muhaana orwa mwa Nsina Nawe.

⁶⁴ Aakhala athiyana anci-ene ooreera murima mpaani mu ohiy’ula, ooreerela, athiyana oororomeleya; masi ori Muhano William Branham mmosa. Ti yoowo onrowa owaani ni miyo. Ti yoowo okhanle mwaar’aka.

⁶⁵ Aakhala athu ooreera murima, mulaponi, ikereja sooreera; masi ori Muhano Yesu Kristu mmosa, ni ti yoowo Owo onimurweel’awe. Ti vaavo vamphwanyaneya Nsina Nawe. Ti vaavo vari okokhoreliwa Wawe, mwa Yeeyo nto Yeeyo paahi. Eyo ekeekhaii. Oh, ayo, mulopwana. Ninnoona wira ekeekhaii.

⁶⁶ Vano, mwaha wa yeeyo, hiyo, “Sothene siniir’ahu ni moolumo hata ni miteko, niniira mu Nsina na Yesu Kristu.”

“Khanivo hata nsina nikina nivaheriwe vathi v’Erimu nikhanly’ahu woopowaka, woohikhala Nsina na Yesu Kristu.” Miteko, kapiitulu 2, enihimya wira, “Musuwele wira...” “Khanivo nsina nikina nivaheriwe vathi v’Erimu vaavo mutthu orin’awe woopowa, mu Nsina na Yesu Kristu paahi.” Amen. Kinroromela wira munniwa saana. Nsina na Yesu Kristu, khula...

Erimu y’osulu saana eniihaniwa Yoowo, “Maloko othene Wirimu aniihaniwa Yesu,” Bibilia oohimya, “ni maloko othene elapo ya vathi aniihaniwa Yesu.” Vano Nlo ti Nsina nithanliwe ni Muluku ni vaavo Owo ohenly’awe Nenlo. Nlo ti nipuro Nawe n’okokhorela-vo, ti mwa Yesu Kristu. Vano, hiyo noosuwela wira ti siiso, khanivo hata nipuro nikina n’okokhorela-vo woohikhala mwa Yoowo.

⁶⁷ “Khanivo hata nsina nikina vathi v’Erimu nivaheriwe atthu, vaavo arinaaya woopowa.” Nawawe ti Nsina na nvuluxo. Muluku ookhalana nsina ninihaniwa Yehova-yire, Yehova-rafa, Yehova-yire. “Apwiya anlevelela itampi sanyu sothene.” *Yehova-rafa*, “Apwiya anvoniha iretta sanyu sothene.” Owo aahikhalana ithoonyeryo sinci-ene. Masi Owo ookhalana Nsina nimosa Noovuluxa, ti na nloko n’atthu, nto nlo ti Nsina na “Yesu.” Nlo ti Nsina Nawe, Owo othanlaly’awe ohela-vo. Owo ohenle vayi Nenlo? Owo ohenle mwa Kristu.

⁶⁸ Masina othene makina a ekereja, iyaaminelo, ithoonyeryo, onkhala okhwa ororomela seiyo. Mwaaroromelaka ekereja Metotista wira yooriheni Wirimu, moopweteya. Mwaaroromelaka aPentekosite, ekereja ya Pentekosite wira yooriheni Wirimu, moopweteya. Ni Patista, Luteraana, Prespiteriyaano, Katolika, khula ekereja ekina; mwaaroromelaka masin’aya, wala ithoonyeryo saya, wala eyaaminelo aya, moopweteya.

Okhala wira, khamukhanle nnakhala okokhorelaka mpakha toko nvolowe nipuro n’okokhorela-vo. Amen. Nlo ti nipuro nimosa paahi Muluku onkuman’awe ni mulipa-ookokhorela, ti nipuro Owo othanlaly’awe wira ahele-vo Nsina Nawe. Othene makina, mwaroromelaru yaawo, munookhwa. Owo nave-tho...

⁶⁹ Eruku ekina ya Yesu va, kookhalana yookwerethiwa, Yoolempwa. Nave-tho, Owo—Owo aari eruku va, “Owo ohaana okhala oohikhalana nlepa.” Nipuro Owo onihel’awe-vo Nsina Nawe, mwaapwittipwitthi ula ohaana okhala oohikhalana nlepa.

Vano, muromolelo xeeni wala eyeettiheryo mukhanly’anyu ohelelaka yeela; ekereja xeeni, Katolika, Prustante, y’aYuta, enakhaleru evi? Eyeettiheryo xeeni, muromolelo, mukhanly’anyu ohelelaka yeeyo, “yooikhhalana nlepa mwa yeeyo”? Yothene ti yookhoottiwa, ni yoothithuniwa!

Masi nookhala nipuro nimosa! Aleluya! Nipuro nlo ti mwa Yesu Kristu. Khanivo hata nlepa mwa Yoowo. Khuuvo hata ohiloka mwa Yoowo.

Khamukhanle ohelelaka yeela. Atthu ala othene aneererya wira siiso, aniira wira ekerej'aya kherina ohiloka ni sothene *iya*. Ti soonanara, oohiiwelela Masu, oophenta, oohalela okhwa, a Lawotiseya, eyaaminelo, masi kehiyo Ekeekhai. Masi hata Pilato mwaneene, nwanani Awe, aahihimya, "Miyo nkinwerya woona nthowa mwa Yoola." Nwanani Awe aahikhalela onamoona wira khinaakhanle hata nthowa mwa Yoowo. Khamunwerya omuhimyana etampi Yoowo.

⁷⁰ Owo aahaahimeerya anamukuttho a mahiku Awe wira, "T'ani a nyuwo onwerya okihimyana etampi Miyo? T'ani onwerya okooniha wira Miyo ka natampi?"

Mukileele ekereja emosa enwerya ohimya wira khenatoko wira ethu yoonoyeya. Voohithepya, khiivo hata emosa, ntoko, ehitonko wiiva ni wira sothene sikhhanle wira siiriwe, voorika. Vano nlelo aniisiihana mmansaya . . . Tivo khanihiyo nipuro na Muluku n'okumana wira akokhoreliwe, mwa hata eyaaminelo nnakhala muromolelo.

⁷¹ Apatthani aka, nkinthuna owiinihani murima, masi kihaana waakhula mwaha wa Mutthaka, ni, Mutthak'owo t'ula, "Mukhume mwa yoonanara ela!" Nto koovekelani wira mukhume, kinrowa wooroihani woowi? Kaamurowa wooroihani oBranham Tabernacle? Eyo ti yoohiloka vanci-ene ntoko khula emosa wa iyo sikina.

Masi nookhala nipuro nimosa kikhany'aka wooroihakani, munkhal'anyu oolipa ni oowaakiheriwa okhwa, nlo ti mwa Yesu Kristu, nipuro na Muluku n'okokhorela-vo. Nlo ti nipuro kiniwoonihery'akani, ohiy'ula, vaavo Muluku ohenly'awe Nsina Nawe. Vaavo Owo aahimmy'awe wira aamukumana ni khula mutthu onvolowa memmo, Owo aamurowa okokhorela ni yoowo ni ohakalala ni yoowo, nlo ti mwa Kristu; kahi hata ekereja, hata etapernakulu.

Masi, mwa Kristu, Owo ti Empa ya Muluku. Owo ti nipuro Muluku aakenly'awe-mo, Mwaneene, khunakhala mwa Yoowo. "Ola Mwan'Aka onimphentexaaka, mwa Yoola Miyo onnikisivela okhala." Ti memmo Muluku aakhanly'awe-mo, khuruuha Nsina Nawe khuhela Nenlo mwa, Yesu Kristu. Tivo, Nsina Nawe naaheliwe mwa Mutthu, Mwan'Awe, Yesu Kristu, mwa yoowo Owo aakhal'awe Mwaneene, ni muhina mw'Empa yeeyo.

Vaavo, mwa ethoonyeryo, Yerusalemu a khalayi, maira a khalayi, empa mookokhorela ya khalayi, yaari ethoonyeryo; okathi mwiixi waakenly'aya, nihiku nivuku naakenly'aya, no waataana, khukhala voopuroni, nto Nsu na Muluku naahiiwiwa okhuma memmo.

Siiso naahiiwanyeya Nsu na Muluku, nirwaaka Mpaani, Yesu Kristu; yeeyo, ya Khalayi (y'erutthu) yaari ethoonyeryo ni eruku ya ele ya Naanaano. Nto okathi Owo okenly'awe mwa Kristu, Owo iirale, "Ola Mwan'Aka onimphentexaaka, mwa Yoola Miyo onnikisivela okhala. Ni Miyo kinoothanla nipuro kinrowaaka ohela-vo Nsina Naka, ni vaavo Miyo kinrowaaka okumana ni mutthu, ni vaavo Miyo kinrowaaka okokhorela." Muluku oothanla nipuro; kahi mmuromoleloni wa ekereja, masi mwa Yesu Kristu. Ayo, mulopwana.

⁷² Owo ohaana nave-tho okhala "oohikhalana nlepa," ntoko sihimaly'aka. Khuuvo muromolelo onwerya ohimya yeeyo. Awo yahimyar; awo awanani a Kristu.

⁷³ Vano hiyo ninnoona va, nwehe eruku Awe tho. Mwa—mwaapwittipwitthi aahaana osukiwa. Vano, ela emphwanyaneya mwa Okhuma 12, mwaalepaka vale, Okhuma 12:3 mpakha 6. Mwaapwittipwitthi aahaana osukiwa mahiku maxexe, wira awehawehiwe, wira ooniwe sinto aari ophwanela orowa ovaheriwa mukuttho. Aahaana okuxiwa, otthikela owehawehiwa, mahiku maxexe, wira ooniwe aakhalanneene nlepa mwa yoowo, ooniwe sinto yaahikhala eretta mwa yoowo, ooniwe sinto yaahikhala etthu yahaalonke ni mwaapwittipwitthi uwo. Aahaana osukiwa mahiku maxexe.

⁷⁴ Vano nwehe. Akina wa nyuwo siiso muupuwenleene vakhani wira yaari yeeyo, wiiviwa mwa na namuloko ni maxexe. Masi, muupuwele, awo yaamukuxa mwaapwittipwitthi nihiku na namuloko na mweeri, ni yaamwiiva nihiku na namuloko ni maxexe, moone, yoowo aasukiwa mahiku maxexe.

⁷⁵ Vano, Yesu, Nsina na Muluku, Mwaapwittipwitthi, aahikela oYerusalemu ni khaakhumme-tho mpakha nuuvira okhwa Wawe, ovithiwa, ni ohihimuwa. Owo aahisukiwa n'alipa-oowuulumela mahiku maxexe ni ohiyu. Moota Mwaapwittipwitthi uwo aathoonyeriwaawe voolikana, oosukiwa mahiku maxexe. Ti vaavo Pilato aahimmy'awe wira, "Nkinwerya ophwanya hata mulattu mwa Yoola."

⁷⁶ Eruku ekina ya Yoowo, khanivo hata nikhuva nimosanaarowa wuntiwa mwa Yoowo, yeeyo yaari yoolikana, okathi yahaawenry'aya. Wiiviwaka mukuttho, awo khayaanta nikhuva. Nantiwaru, waamukhoottiwa. Nto awo yaahinvexa martela wira yinte makhuva mmettoni mwa Kristu, okathi awo yaahimmy'aya wira, "Owo ohookhwa." Awo yaahimuhoma mpararini mw'Awexhuphwanya Ephome ni maasi.

⁷⁷ Nkawehani-tho etthu ekina yuulupale va. Nkaakhanle otuphaka eyo, okhala wira Owo aahooniheriwa mwa soovaha, ovahiwa otthu.

Kinnuupuwela okathi mmosa yaakhalaniw'aya exikola, mBibiliani, yihaniwa exikola ya maprofeta, ni yaari exikola ni vakhani. Nto hiyo ninnoona wira Eliya aahirowa weiwo

exikola yeeyo nihiku nimosa, nto awo khwira, “Hiyo. . .” Awo khunvekela wira arowe, khwira, “Nyuwo mwakhala wenzo, itthu sinkhala soowokololowaxa.” Tivo awo yaatthuna wira owo arowe.

Ni awo khurowa omuphavelela yolya y'ohiyu. Vano nikhuru nimosa n'anamukuttho khurowa, ahiiso maprofeta, wira yaphavele epwiri, wira empakele yolya y'ohiyu. Nto okathi awo yiiraly'aya siiso, yaahitakanxa eventaali yuulupale yoosarya; nto vahokolonw'aya, yaari amarapo a mutakhwani, yaari oohapala, nto awo khwaahela mmwaapuni. Vano mwaapu khupacerya okaphula, nto awo, mutthu mmosa, khwira, “Mayi, wookhala okhwa mmwaapuni mu. Vano khaninwerya hata olya.”

Nto Eliya khwira, “Mukiruuhele nikuphi na otthu.” Vano owo khukuxa otthu ene khwiitthela mmwaapuni, khwira, “Lyaakani. Mwaapu woovonihiwa.”

⁷⁸ Otthu woovahiwa aari Kristu. Khula nxilo naahaana okhalihiwa vamosaru, ni khula otthu vakhani waahaana oxiliwa enamuna emosaru, wa otthu woovahiwa. Yooniheryaka, wira, Owo ti mpenuxa. Owo onoorantela, ni okumiha okhwa, n'uhela Ekumi; ni ikano piili. Aleluya! Vamphwanyaneya okhwa, nipuro nimosa; Kristu akela vale, Ekumi enookela. Owo mmosaru nsana, olelo, ni mahiku othene. Nto vatthu vaari okhwa, waahikhala Ekumi, okhala wira Kristu aahiruuhiwa, ovahiwa wa otthu.

⁷⁹ Makano xeeni maalupale itthu iya saarow'aya okhala naakunxeru okathi wira nitaphulele kamosa-kamosa! Vano nwehe, khanivo hata nuulumo nimosa na iruku ninvonyeya. Khanivo hata nuulumo nimosa nitonko ovonyeya, na eruku. Itthu sothene saahilikana oratteene.

Owo ti nipuro n'okokhorela-vo nithanliwe ni Muluku, ni Nsina na Muluku onivahiwa Yoowo. Owo ti nipuro n'okokhorela-vo nithanliwe ni Muluku, ni Nsina na Muluku onivahiwa Yoowo. Owo ti Masu a Muluku, ni Owo ti Nsina na Muluku. Owo ti soopiili Masu a Muluku ni Nsina na Muluku. “Owo aari Masu yiipanke erutthu.” Owo aari Masu a Muluku, Mwaapwittipwitthi a Muluku, Nsina na Muluku, ni aari Mulukuu. Ti yeeyo Owo aary'awe, nipuro noothanliwa ni nimosa paahi n'okokhorela-vo nithanliwe ni Muluku.

⁸⁰ Nto Muluku onnikhootta khula nipuro nikina noohikhala mwa Yesu Kristu; khamukhanle omukokhorelaka Yoowo nipuro pi nipuro. Owo ohimye wira, “Awo anikikokhorela mahala, yiixuttihaka ikano s'atthu ntoko Mwiixuttiho.” Olelo nookhalana iyaaminelo, makano, ni itthu sothene, siniixuttiha wira *ela* t'ephiro ni *ele* t'ephiro.

Ni Yesu oohimye wira, “Miyo k'Ephiro, Ekeekhai, ni Ekumi, ni khaavo onwerya orwa wa Muluku ahivinre wa Miyo.” Mwa moolumo makina, “Miyo ka Mukhora wa munikhomani.

Othene akina anawiiye.” Owo mwaattamelo mmosa paahi. Owo ti Mukhora. Owo t’Ephiro, Ekeekhai, Ekumi, sothene sikhanel; evolowelo emosa paahi, nipuro nimosa paahi, okokhorela omosa paahi, Nsina nimosa paahi.

Sothene siliphiwe mwa Yesu Kristu. Waataana Wa Khalayi wothene oliphiwe mwa Yoowo. Waataana Wa Naanaano oliphiwe mwa Yoowo. Ni Ekereja olelo eliphiwe mwa Yoowo, ni Masu a yooruma Awe. Khanikhanle nipuro nikina, wala Nsina nikina, wala nipuro pi nipuro, vaavo Muluku otonko awe ohimya wira aamukumana ni mutthu; mwa Yesu Kristu paahi, nipuro Nawe nithanliwe n’okokhorela-vo.

⁸¹ Nwehe, Muluku aahihimya okumana n’alipa-ookokhorela Awe nipuro nimosa nenla paahi, nto nlo ti n’othanla Wawe Yoowo mwaneene; kahi othanla wahu, kahi no wupuwela wahu; masi no wupuwela Wawe, othanla Wawe. Ni naarowa okhala nipuro vaavo Owo ohenly’awe Nsina Nawe, vaavo Owo othanlaly’awe. Tivo ninnoona wira ninniphwanya vatthu naarivo Nsina Nawe, nenlo Owo othanlaly’awe, ni othanla Wawe Mwaneene.

⁸² Vano niphwanyaly’ahu nipuro Owo ohenly’awe Nsina Nawe, eyo ti wi, mwa Kristu Yesu, ni wira khanivo hata nipuro nikina, wala hata nsina nikina, nyuwo moosiveliwa ni yeeyo? Mwiire, “Amen.” [Muthukumano oniira, “Amen.”—Mol.] Vano, etthu ene t’ila, vakhala wira ninophwanya vari nipuro nene. . . Nipuro n’okokhorela khaninkupaliwa hata nipuro, mwa Kristu paahi.

Nyuwo pooti orukunxa murima, pooti wira yeeyo, masi khamunkokhorela nlelo. Munvekela oleveleliwa. Petru iirale. . .

Nihiku na Pentekosite, okathi yooniwaaya awo othene olavula ilavulelo, ni ithoonyeryo suulupale ni mitikiniho siiraneyaka, awo khupacerya otheya, ekereja khupacerya, khwira, “Atthu ala asareiye eviinyu ya naanaano. Awo aniira ntoko atthu oohapaliwa. E. . .” Maria harusi, othene aya, yaari vamosa, emiya ni miloko miili a yaawo. Vano awo yaamuveveleya ntoko atthu oohapaliwa, ni elavulaka ilavulelo, ni yiiraka ithu siiso. Awo khwira, “Atthu ala asareiye eviinyu ya naanaano.”

⁸³ Masi Petru, avenyaka, khwira, “Alopwana n’axinna, atthu ala khahapalasiwe, maana ela ewoora ya neeraru paahi ya nihiku. Masi ela t’ile yaalavuliwe ni profeta Yoweli, ‘Nto enimwiiraneya mahiku ookiserya, onihimya Muluku, Miyo kinimwaamwaraxela Eroho Aka atthu othene; an’inyu alopwana n’athiyana anoolaleerya s’eprofeta; arumeyi aka alopwana n’athiyana kinimwaamwaraxela Eroho Aka. Kinimooniherya ithoonyeryo osulu wirimu, ni vathi; mooro, malumi a mooro, otthuwa wa mwiixi. Enimwiiraneya, nihinatthi ophiya Nihiku nuulupale ni noowoopiha n’Apwiya, wira othene ale anrowa ovekela mwa Nsina n’Apwiya animoopowa.’”

⁸⁴ Vaiwaly'aya siisa, murima waahaariipa vanci-ene, khwira, "Alopwana n'axinna, nto niireke-ni?"

⁸⁵ Petru khwira, "Murukunxe murima, khula mmosa a nyuwo, mpatisiwe mu Nsina na Yesu Kristu wira muleveleliwe itampi sanyu, nto munimwaakhela yoovaha ya Eroho Yowarya. okhala wira natiri t'a maloko othene anrwa ohoolo." Vano ninniphwanya yeeyo.

⁸⁶ Vano nintthuna niphwanye moota w'okela *mwa* Yoowo. Hiyo ninkela sayi nipuro nla n'okokhorela-vo? aKorinto Oopacerya 12 annilakiherya yeeyo, maana, "Mwa Eroho emosaru!" Kahi mwa ekereja emosaru, kahi mwa eyaaminelo emosaru, kahi ni pastore mmosaru, kahi ni pixipu mmosaru, kahi ni namukuttho mmosaru. Masi, "Mwa Eroho Yowarya emosaru hiyo othene noopatisiwa mw'Erutthu emosaru," ekhanle Erutthu ya Yesu Kristu, ni oowiiwelela khula yoovaha emphwanyaneya mw'Erutthuni yeeyo. Ayo, mulopwana! Kahi wiitakanxa, kahi ohimya iyaaminelo, kahi osariha, oyeehi, ovahana matata, wala etthu ekina. Masi, mwa Oyariwa hiyo noopatisiwa mw'Erutthuni ya Yesu Kristu! Amen. "Mwa Eroho Yowarya emosaru hiyo othene noopatisiwa mw'Erutthuni emosaru."

⁸⁷ Nto Erutthu iyo t'ivi? "Wopaceryani naari Nsu, nto Nsu naari ni Muluku, ni Nsu naari Muluku. Vano Nsu naahiipaka erutthu khukhala ni hiyo." Vanweryaneya sayi hiyo okhala mw'Erutthuni mmo ni okhootha Nuulumo nimoso na Yeeyo, wala okumihana Nenlo okhaliha nipuro nikina Nlo nihinkhaly'aya mw'Erutthuni? Vanweryaneya sayi hiyo okhalakhala niiraka? Nipuro nithanliwe ni Muluku!

⁸⁸ Nwehe, nto nyuwo mwapatisiwaru vekeekhai mwa Yoowo, eyooniheryo y'ekeekhai okhala wira munoomwaamini Yoowo, Masu.

Munwerya sayi okhala epantte ya Yoowo vano nto khunamukhootha Yoowo? Kinwerya sayi miyo okhootha ntata naka okhala ntata naka? Yakhala... Kakhootha-ru, yookhala ehilonke mmuupuweloni mwaka. Nto kinwerya sayi miyo? Yaakhanleene etthu ehilonke ni muupuwelo aka, okhootha wira ntata naka, okhootha wira nnawu naka, yookhala etthu muroohoni ehilonke wa mulipa-oowaamini onikhootha khula Nuulumo Muluku otonko awe ohimya ni olaihenry'awe. Yookhala etthu muroohoni ehilonke ni owo oniihaniwa mulipa-oowaamini.

⁸⁹ Khamukhanle okhooataka eleetera emosa ya Yoowo, okhala wira mookhala epantte ya yeeyo, Nyuwo mwa epantte a Yoowo okhala wira moopatisiwa mwa Yoowo; mwa, Eroho Yowarya ehooruuhani mw'Erutthuni mwa Yesu Kristu. Etthu xeeni yooreera!

90 Muluku aahikhalana nipuro nimosa Owo aakumann'awe—Owo aakumann'awe ni Abrahamu, nto vaavo Abrahamu aahikokhorela. Mwa Waataana wothene!

Ni Masu Awe oolaiheriwa anootaphuleliwa mwa nyuwo, ni Yoowo. Muhiiwa saana yeeyo? Masu Owo aalahenry'awe omaliherya mahiku nyuwo munkhal'anyu: nyuwo munrowa okhala epaphelo yoolempwa ya Muluku, enisommwa n'atthu othene. Kahi ele munihimy'anyu, masi Ele Muluku eniir'awe mwa nyuwo, enoolavula vancipale ovikana etthu p'itthu mwaakhanly'anyu ohimyaka. Muluku oohimya, "Ithooneryo iya sinimwaatthara ale anaamini." Eyo enlavula eviraka mwa nyuwo.

91 Owo aahilavula mwaha w'okathi ula, ele yaarowa okhala vano. Alipa-oowaamini a okathi ula ahaana waamini Yeela, etthu Owo olaihenry'awe olelo. Vekeekhai enamuna emosaru awo yaarin'aya okela mukalawani, wira yoopowe; okhuma wEjitu wira yoopowe; awo ahaana okela mwa Kristu, wira yoopowe vano, okela muhina mwa Masu Mutthaka, wira Owo mmosaru nsana, olelo, ni mahiku othene.

92 Munkela sayi Memmo? Ni opatiiso! Opatiiso wa xeeni, maasi? Ni Eroho Yowarya! "Eroho emosaru, hiyo othene noopatisiwa mw'Eruythuni yeela emosaru."

93 Nto Masu Awe oolaiheriwa, Owo khonrowa . . . Khamunrowa okhala ootaphulela Yaawo. Owo onootaphulela Yaawo eviraka mwa nyuwo; etthu eniir'anyu, etthu Owo aahimaly'awe wira. Ekereja enimutthara Yoowo enrowa okhala yoolattanexa ni Yoowo mpakha atthu anrowaaya osuwela.

Nkanweheni Petru ni Yohani okathi yaakohasiwaaya mwaha w'omuvoniha mulopwana mmosa vamukhora oniihaniwa Wooreera. Awo khwira, "Awo yaahoona wira," anamukuttho ale yaahoona, "wira awo oowaili yaari atthu oohisuwel'etthu ni oohisoma," masi yaahoona wira awo yaahikhalasa ni Yesu. Okhala wira, (exeeni?) awo yiira itthu Owo iiraly'awe.

94 Owo aahaana okhala avaraka muteko w'Atithi. Ni olelo ehaana okhala etthu emosaru.

95 Vano, muupuwele, Owo mmosaru nsana, olelo, ni mahiku othene; maana Muluku onkumana ni nyuwo mwa Yoowo, nipuro nimosa paahi nikhanel; maana ti vaavo Owo othanlaly'awe wira ahele-vo Nsina Nawe, mwa Yesu. "Yesu" ti Nsina na Muluku. Muupuwele, Tithi, Mwaana, Eroho Yowarya, ithooneryo sa Nsina "Yesu Kristu."

96 Okathi Matewu iiraly'awe, "Murowe, mwawiixuttihe atthu a maloko othene, mwaapatisaka mu Nsina na Tithi, na Mwaana, ni na Eroho Yowarya."

Moota entaphuleliw'aya voohiloka olelo, ni wiiriwa, "Mu nsina na Tithi, nsina na Mwaana, nsina na Eroho Yowarya." Eyo

hata khelempwe. Ti, “Mu Nsina,” nimoso, “na Tithi, Mwaana, Eroho Yowarya.” *Tithi* khanihiyo nsina, *Mwaana* khanihiyo nsina, *Eroho Yowarya* khanihiyo nsina; eyo ethoonyeryo.

Mahiku muloko ohoolo waya, Petru aahivenya khwira, “Murukunxe murima, khula mmosa a nyuwo, mpatisiwe mu Nsina na Yesu Kristu.” Vano owo iirale etthu Owo aamuhimenry’awe wira ahiire? Iirale etthu Owo aamuhimenry’awe wira aire. Nsina na Tithi, Mwaana, ni Eroho Yowarya ti “Pwiya Yesu Kristu.” Khula mutthu mwa Waataana Wa Naanaano aapatisiwe mu Nsina na Pwiya Yesu Kristu.

⁹⁷ Khaavo hata mutthu mmosa mBibiliani aatonko opatisiwa ni ithoonyeryo sa Tithi, Mwaana, Eroho Yowarya. Eyo khenakhaleke mpakha eyaaminelo y’oNicea opakiwa oNicea, Rooma. Yaari yooruma ya ekereja Katolika, yoophwanyawa, etthu emosaru yoolipiheriwa, mukatikeesini. Miyo kookhalana, ti yeeyo, *Sookhumelela Sa Waamini Wahu*, ni sikina, eyo vekeekhai eyaaminelo y’eKatolika y’oRooma. Awo animooleelani wira khekhanle mBibiliani; masi anihimya wira aakhalana owerya w’orukunxa Masu awo, awo yatthuna vale, mwaha wa paapa. Miyo kinnivaanya.

Yesu Kristu mmosaru nsana, olelo, ni mahiku othene. “Ni ole onrowa okumiha Nuulumo nimoso mBibiliani mu,” ohimnye ti Yesu, “wala ohela-mo nuulumo nimoso mwa Yoola, mpantte awe onookumihiwa muLiivuruni mw’Ekumi.” Nuulumo nimoso; kahi efraase, wala eparaakrafu, masi Nuulumo nimoso! “Ole onrowa okumiha Nuulumo nimoso . . .”

⁹⁸ Wopaceryani, Muluku aahaalipiha atthu awe ni Masu Awe. Nuulumo nimoso, noohitaphuleliwa saana, nooruha okhwa wothene, khula owerya wa murima, khula muxankiho. Hawa, owo khaahononne efraase; owo aahononne Nuulumo nimoso. Yesu varwiiy’awe eriyari ya Eliivuru. . . Ele waari wopaceryani w’Eliivuru.

Yesu varwiiy’awe eriyari ya Eliivuru, Owo aahimnye exeeni? “Yolempwa wira mutthu khankhala mukumi ni yolya paahi, masi ni Masu othene ankhuma mwaano mwa Muluku.”

Wookiseryani w’Eliivuru, Wiisuupulula kapiitulu 22, versiikulu 18, epantte yookiserya ya Bibilia, Yesu onlavula Mwaneene, khwira, “Miyo kinnilopola wira akhala mutthu onrowa okumiha Nuulumo nimoso muLiivuruni mu, wala wuncererya nuulumo nimoso Muumu, mpantte awe onookumihiwa muLiivuruni mw’Ekumi,” okhala wira owo profeta oowootha ni ohaataphulelela atthu voohiloka, ni ephome aya enookhala mmatatani mwawe, mwaha wo wira siiso.

⁹⁹ Nihaana osuka nipuro nenlo nimoso n’okokhorela-vo, eyo ti wi, Yesu Kristu Masu, mmosaru nsana, olelo, ni mahiku othene. Amen. Vaareera. Muupuwele, khanivo hata nipuro

nikina n’othukumana wira nikokhorele, hata nipuro. Muluku oothanla Nenlo.

¹⁰⁰ Yohani, wuwu vanlутtenі wa Waattaana Wa Naanaano ni Wa Khalayi. Nwiriyaane orateene vano. Nwehe oratteene. Yohani, xawawe ole muulupale, aahirwa avavaka akhumaka mothakoni nihiku nimosa, mapupha awe maalupale ataphunweene. Owo aakotenle mukerekhere wa Yordani, profeta muulupale xawawe omuluttanihale Waattaana Wa Khalayi ni Naanaano, owo aahiwiіhana okhuma moonoo woolopwana ni woohiyana. Owo aalaleerya nihiku n’orukunxa murima.

Vaavo jaarwiі’aya aFarisi n’aSatukhi; owo khwira, “Muhipacerye ohimya muhina mwa nyuwo, ‘Hiyo nookhalana Abrahamu tiith’ihu,’ ’okhala wira kinooleelani wira Muluku onniwerya otatuxa maluku ala ekhale aana a Abrahamu.” Oh, wulu!

Okathi opaceny’awe omwarya Ehapari awe yooreera, ni airaka, “Ookhala Mmosa eemenle eriyari anyu, Yoowo muhimmusuwel’anyu. Miyo nkinatthi omusuwela Yoowo, masi kinoomusuwela Owo arwa vale. Miyo nkimphwanela otaphula exapattho Awe. Masi Owo onrowa woopatisani ni Eroho Yowarya ni Mooro. Ni ethokwa Awe eri mmatatani mw’Awe. Owo onoovera epyo Awe, ni onoopaha mivelo ni Mooro ohinttipha-tho.”

¹⁰¹ Xawawe ole muulupale a Ehapari yooreera aaphwanyaneya vale, alaleeryaka woopopiha wawe wuulupale. Ni soonanara saanikhuma, wala Heroti, mwene okathi ule, namalamula, aamuthenle mwaara a munn’awe. Nto mwaamuwerya otthokelela xawawe ole muulupale a Ehapari yooreera ophwanyaneya vaavale khunamaala mwaha wa yeeyo?

Akina wa awo yiirale, “Muhilaleye mwaha wa othelana ni omwalana vano, Yohani, ’okhala wira Heroti ori vo.”

¹⁰² Owo khumwaattamela saana wiitho wawe khwira, “Khivamphwanela nyuwo omukuxa.” Khweeli!

Exeeni, owo, yaari iyo? Owo aari xawawe ole aakhumme mothakoni. Owo khaaxuttihiwe mwa itutuxeryo ni woopopiha wa mutthu, a muromolelo. Masi owo aaxuttihiwe ni owerya wa Muluku Oowerya sothene, wira asuwele etthu jaarowa okhala vale. Owo aanisuwela osuwanyeya wa Mesiya.

Aleluya! Nuulumo nlo nnihimya, “Attotopeliwe Muluku ahu!” Muhoove. Nkinaphiyerye omunanariha mutthu. Miyo nkitannyeyi. Kinnisuwela saana vary’aka.

Oh, kaamuupuwelaka yoowo, xawawe ole muulupale avavaka iwe ni akotelaka! Owo khwira, “Miyo kinoomusuwela Owo arwaaru.”

¹⁰³ Nihiku nimosa owo aaphwanyaneya vale, alaleyaka. Anamukuttho yaari epantte ekina, khwira, “Nyuwu muntthuna

ohimya wira onoophiya okathi mukuttho wa khula nihiku onrowaaya okumihiwa; emp'ela yookokhorela hiyo nitekaly'ahu, ni muteko wothene nivanry'ahu, hiyo muromolelo muulupale?"

Owo khwira, "Onoophiya okathi sothene iya sinrowaaya onyaanyiwa."

"Ehikhaleke siiso. Nyuwo mwa profeta oowootha!"

¹⁰⁴ Nto owo khuweha vale. Owo khwira, "Mmoone, Ole ori vale! Nlo vo nipuro n'okokhorela nithanliwe ni Muluku. Owo vo Mwaapwittipwitthi, Mwaapwittipwitthi eekeekhai onttipiha itampi s'atthu." Owo khaahimye wira, "Va onoorwa Mmetotista, va onoorwa muPatista, wala muKatolika." Owo iirale, "Vo onoorwa Mwaapwittipwitthi a Muluku onttipiha itampi s'atthu."

Nipuro nimosa paahi n'olipa nikhanye ti mwa Mwaapwittipwitthi yoowo a Muluku. Mwa Yoowo paahi t'uri woopowa; kahi mwa hata ekereja, hata eyaaminelo, hata mutthu, hata tiithi, hata mai, hata mutthu oowaarya, wala hat'etthu, nipuro noowaarya. Onkhala mwa Muluku Oowaarya, Pwiya Yesu Kristu, vaavo Muluku ohenly'awe-vo Nsina Nawe mwa Mutthu, wira avuluxe, Yoowo onilivenrye esisapo hiyo anatampi. Nlo ti nipuro nimosa paahi okhanle-vo woopowa. Owo ti Mwala onlip'aka-vo.

¹⁰⁵ Yohani aahimusuweliha Yoowo. Owo iirale, "Miyonkaamusuwela okathi omoonaly'aka Owo orwa eettaka, masi weiwo wiixuttihw'aka..." Kahi oseminaariyu ntoko atithi awe yiiraly'aya; kahi ntoko namukuttho, oosomihiwa. Masi mothakoni, weiwo aary'awe-wo oseminaariyu wa teyoloxiyya ya Muluku Oowerya sothene, alipelelaka Masu a Muluku; kahi etthu nikhuru n'atthu yaakhalihaly'aya, masi etthu Muluku aahimaly'awe wa Yeeyo. Nto okathi Yohani owehaly'awe osulu khoona Eroho ekhuruwaka, owo khwira, "Miyokinnikhalela onamoona, ola ti Yoowo." Oh, wulu!

Vo ti nri nipuro nanyu n'okokhorela-vo. Vo ti nri nipuro nanyu no wiipitha-vo. Owo vo Mwaapwittipwitthi a Muluku onttipiha itampi s'atthu. Kahi ekereja, kahi eyaaminelo, wala etthu ekina, masi Mwaapwittipwitthi a Muluku onttipiha itampi s'atthu.

¹⁰⁶ Munnoona moota Yohani aahelenly'awe? Owo khiirale, "Nyuwo aFarisi muhaana exariya, nyuwo aSatukhi, a Heroti." Owo iirale, "Owo vo Mwaapwittipwitthi." Nlo ti nipuro. Owo ookhalana Nsina. Owo ti Mmosa. Kahi nsina nikina vathi v'Erimu!

¹⁰⁷ Nwehe etthu Yesu aahimmy'awe mwaha wa Yohani vano. Nihiku nimosa Yohani aahiruma oroiwa wa Yoowo, wira yooniwe etthu Owo aavar'awe. Yesu khuhimya sa yoowo, "Owo aari muthuko yoole muulupale ni woowaarya," wira owoonihe ephiro yooloka yaarin'aya otthara ehinatthi

ophiya ephiyeryo Awe, ephiyeryo Awe yoopacerya. Nwiriyaneratteene. Muhihaleele. Yesu iirale, “Yohani aari muthuko yoowo.” Malakhiya 3, voohivonya! Profeta aarina muthuko muulupale woowaarya aahimusuwela Yesu okhala Mmosa paahi, “Mwaapwittipwitthi.” Amwaapwittipwitthi othene akina anamukuttho ale yaahim’yaya, ni itthu iye sothene sikina, saari ithiru. Va aari “Mwaapwittipwitthi!” Mutthu aarina muthuko muulupale woowaarya, Yesu aahim’yawe wira aari yoowo.

Malakhiya 3 iirale, “Kinoomuruma namitthaka Aka ohoolo Waka wira alokiherye ephiro.” Nto ole aarummwe wira alokiherye ephiro, aahimusuwela Yoowo, nipuro. “Ti Yoowo! Khuuvo ovonya. Ti Yoowo! Kinnoona ethoonyeryo emuttharaka Yoowo. Koosuwela wira ole ti Yoowo; Waarya waakhuma Wirimu orwaaka vasulu Vawe.” Aahikupali, wira aari Yoowo.

¹⁰⁸ Vano, munn’aka, kintthuna kookoheni etthu emosa, kimalihaka. Ninrowa ohimya ela. Malakhiya 4, khanilaiheriwa xawawe mukina, Nripu na Waarya nittharaka, wira yooniherye ekereja namweettasa olelo wira Owo ti aHeperi 13:8, “mmosaru nsana, olelo, ni mahiku othene”? Khanilaiheriwe mukina orwa avavaka okhuma mothakoni? Amen! Eyo Ekeekhahi yoolikana. Moota ery’aya yoophwaneleya ni yoolikana ni Luka 17:30, vaavo Mwaana a mutthu (Xawawe) onrowaawe wiisooniherya Mmansawe wira aruuhele ohikhal’etthu mapuro othene makina ookokhorela-vo, ntoko miromolelo ni sikina!

Muluku oothanla nipuro Nawe. Yohani iirale, “Nlo vo!”

¹⁰⁹ Vano nto noomwaakhela natiri a etthu emosaru olelo, Malakhiya 4, “Orukunxa mirima s’ana otthikela ottuli,” wira ahimye wira Owo khakhwiye, itthu iya khasihiyo s’okathi mukina; opatiiso mu Nsina na Yesu khawaari wa khalayi wu, masi vano Owo mmosaru. Amen. Wira aruuhele ohikhal’etthu mapuro othene makina ookokhorela-vo, ti yeeyo xawawe a mahiku ookiserya ory’awe wira aire, wooniherya wira sothene sikina ololo, muromolelo ohitthokelela, masi waathooniherya-tho ni ethoonyeryo emosaru Owo iiraly’awe, wira Owo mmosaru nsana, olelo, ni mahiku othene. Aleluya!

¹¹⁰ Nave-tho, mwa Wiisuupulula 4:7, naahikhalana Inama xexe nimanly’ahu osoma.

Yoopacerya yaari, ninniweha wira . . . ninniweha wira, aari kharamu. Eyo ti yaari Enama yoopacerya yaaronwe okumana ni mutharimulo wa nihiku nle, Kharamu a Nihimo na Yuta.

Numala Owo khurwa Enama yaattharelana. Nto ninnoona wira, Enama yootharelana yaari enyompe, ekhanle enama ya muritti, mukuttho. Mahiku a katetrale y’oRooma, Ekereja yaahikhwa; mukuttho.

Yootharelana yaaruule, aari mutthu, yaari Enama yaarina wiitho wa mutthu. Nto mutthu yaari anamareherya, osoma wa mutthu, teyoloxiia, ni sikina.

Masi Enama yookiserya yaari wira evaveke, Enama yookiserya yaarowa orwa, Bibilia ohimye wira aari xawawe avavaka. Alaluya! Ni profeta ohimye wira, nihiku nenla, "Onookhala Waarya." Oh, wulu! "Nihiku nenlo onookhala Waarya."

¹¹¹ Naahikhala nihiku n'anamarehererya. Naahikhala nihiku yaari eruku paahi, nihinweryaneyya wihaniwa othana wala ohiyu. Masi okathi wa makaaripi, okathi wa Xawawe:

Onookhala Waarya okathi wa Xawawe,
Ephiro ya Moovuwani vekeekhai
munoophwanya;
Mphironi mwa maasi ori-mo Waarya olelo,
Oovithiwa mwa Nsina nooreerexa na Yesu.
Amiravo n'atokweene, muttharuwe itampi
sanyu sothene,
Eroho Yowarya vekeekhai enimoopatisani;
Maana Waarya wa makaaripi woophiya,
Ti ekeekhai wira Muluku ni Kristu ari
Mmosaru.

¹¹² Amen! Onookhala Waarya okathi wa makaaripi, nipuro nimosa paahi n'okokhorela-vo nithanliwe ni Muluku. Oh, Mutthak'ola ophiyenrye yayi, Owo onrowa wira exeeni? Nto nihiku nawe onookhala Waarya okathi wa makaaripi, ni (exeeni?) wira awaakhele an'Awe othikela owaani Muttetthe wa natiri w'ekeekhai, ni ethoonyeryo emosaru ya Nlumi na Mooro yaawettinhe aana a Isarayeli eviraka mothakoni.

Nipuro n'okokhorela nithanliwe ni Muluku, Yesu Kristu. Nlo ti nipuro nimosa paahi nikhanle. Nlo ti Nsina nimosa paahi Muluku orin'awe wa woopowa. Ti mwa nenlo Owo iihanann'awe maloko Wirimu, akhalaka elapo ya vathi, ti Yesu Kristu.

¹¹³ O ekereja, O atthu, mpatthani natampi, muhiroromele hat'etthu ekina woohikhala Yesu Kristu. Muhimuroromele hata mulaleyi. Muhimuroromele hata mutthu mukina wira awoopoleni. Muhiroromele hata ekereja, hata eyaaminelo, hata muromolelo. Mmuroromele Yesu Kristu paahi, okhala wira Owo t'okhanle Waarya w'okathi.

Nuuramihe miru sahu.

Onookhala Waarya okathi wa makaaripi,
Ephiro ya Moovuwani vekeekhai
munoophwanya;
Mphironi mwa maasi ori-mo Waarya olelo,
Oovithiwa mwa Nsina nooreerexa na Yesu.
Amiravo n'atokweene, muttharuwe itampi
sanyu sothene,

Eroho Yowarya vekeekhai enookela;
 Waarya wa makaaripi ohoorwa,
 Ekeekhayi wira Muluku ni Kristu ari
 Mmosaru.

¹¹⁴ Oh, munna mulopwana, muthiyana, vakhala wira khamurukunxale murima nlelo, vakhala wira khampatisiwe mu Nsina na Yesu Kristu, mwaamutthuna opacerya ohiy'ula? Mwaamutthuna onvaha Muluku okathi wo owaakhelani nipuro mukhanly'anyu omukokkhorelaka Yoowo? Muupuwele, woohikhala vaavo, khanivo hata nipuro Muluku ohimmy'awe okumana ni nyuwo ni waakhela okokhorela wanyu.

¹¹⁵ Nyuwo muniira, "Munna Branham, miyo kinnikokhorela vaxariya-vo!" Kayini aahikokhorela siiso. Owo aahivaha inamuna sothene sa soovaha Apeli aavahaly'awe, masi waari ovaha woohiloka. Khino nyuwo munnirowa okereja, ni oliva sanamuloko sanyu, ni ovara muteko anyu ntoko muKristu orin'awe wira, vaxariya-vo ntoko khula mulopwana wala muthiyana.

Kinnikhalaka nno vano mwa iyaakha miloko miraru, opooma nno, ni olaleerya Mutthaka ene yoola. Miyo kinimuuluvala. Nkikhanle okhalaka ni nyuwo okathi munci-enexa. Masi muupuwele, Nihiku na Olamuliwa, nsu naka nookaravariwa, nto nlo ninoorowa olavula noovirikanyakani.

¹¹⁶ Nri nipuro nimoso paahi Muluku onihel'awe-vo Nsina Nawe, ni kahi mukereja, masi mwa Yesu. Nri nipuro nimoso paahi n'okokhorela-vo, nipuro nimoso paahi nyuwo munaakheliw'anyu, nto nlo ti mwa Oophentiwa, Yesu Kristu. "Khanikhanle nsina nikina vathi v'Erimu, nivaheriwe eriyari y'atthu, vaavo nikhanly'ahu woopowaka," hata ekereja, hata eyaaminelo, hat'etthu. Yesu Kristu!

Nto ola ohaana okhala Mutthaka w'okathi, "Ohokoloxerya mirima s'ana, otthikela Waamini waatonko ovahiwa atthu ooreera murima." Khamuntthuna okupali Yoowo ohiy'ula?

Ni nirineene miru sahu soowuurama.

¹¹⁷ Ni ale yaatthuna wira yuupuweliwe mmavekeloni, nvenxe matata. Khanikhanle wiihanaka waltaari, okhala wira khareere waatta. Muluku ooreeriheni. Wulu! Moono aka woohiyana, kinoona wira aakhala imiya tthaaru.

¹¹⁸ Vano moono aka woolopwana, mwaamutthuna ovenxa ntata, mwiire, "Kintthuna kuupuweliwe." Kinoona wira aakhala emiya ni miloko mithanu, wala oovikana, moono aka woolopwana.

Nookhalana etapernakulu ohitto nno erina etanki yuulupale ya maasi; pastore, pastore ooreera murima, Munna Orman Neville, ootakanxana, axilopwana ala va muniwoon'anyu ni waasuwela. Khula nihiku, khula ohiyu, khula okathi, atthu

antthuna opatisiwa, arukunxale murima, kweekwe enoolipelela. Ni nyuwo mwaiwelela yooruma elo, ti ekeekhai, ni natiri a Muluku, mwakhala a xariya mmurimani mwanyu, wira mwaakhele opatiiso wa Eroho Yowarya.

¹¹⁹ Nri nipuro nimoso paahi n'okokhorela-vo. Vano, nlo khanihiyo mutapernakulu. Nlo ti mwa Kristu. Hiyo ninkela sayi mwa Yoowo? "Mwa Eroho emosaru hiyo othene noopatisiwa mw'Erutthuni yeela emosa."

Nivekele.

¹²⁰ Muluku Oothuneya, vavenxiwaaya matat'ala, awo ahimye ele yaari vathi va ntata nlo mmurimani, ekupalelo wira awo aakupali wira annitthuna mukhaliheryo onikhuma wa Nyuwo. Kinaavekelela khula mmosa a yaawo, Tithi. Ni kinrowa ohimya Masu Anyu. Nyuwo moohimya, "Ole oniiwa Masu Aka, ni onimwaamini Ole okirumme, ookhalana Ekumi ehinimala, ni khanrowa Ohukhummwa; masi oovira mookhwaani khuphwanya Ekumi."

Tithi, ohikhala mmuttettheni isumana vakhani, koothhika, khukoha, "Mwaha wa *ola*?"

"Vano, ohookhwa."

"Ahe, ankhii . . ."

"Ohookhwa."

¹²¹ Muluku Ootthuneya, mmosa mmosa hiyo ninimwiitthaniwa, mmosa mmosa nihaana okumanana mutharimulo wo weetta mukhatoni wa muuttutthi wa mookhwaani. Ni eyo ti ya wa khula mmosa a hiyo, ntoko atthu anookhwa. Masi, ohiy'ula, Nyuwo moonivaha yoovekela Anyu, wira namwaaminiru Yoowo khupatisiwa mwa Nsina Nawe, Nyuwo mwaamunikupali. Vano nto mw'Erutthuni yeela, Erutthu ya Kristu, kahi mukereja; masi mw'Erutthuni ya Kristu, Erutthu iyo yoohukhummwa. Khenrowa-tho orwa Moohukhummwani. Muluku ooyeeherya oviruwa Wawe erutthu yeeyo, ni erutthu iyo kherina etampi; ni, okhala mwa Yoowo, onnitaphula mw'etampi, mwaha wa Elivelo Awe wira onikhwela hiyo. Ni memmo nookhalana opatthana mmosa ni mukhw'awe. okathi Ephome ya Yesu Kristu, Mwaana a Muluku, ennikhali'h'aya ooloka wa etampi yothene ni ohononeya.

¹²² Muluku Tithi, kinvekela wira Nyuwo mmukuxe khula mmosa Moomweneni mw'Anyu. Munivahe, Muluku. Wira ahikhale hata mmosa onipweteya; ahikhale hata mmiravo nnakhala mwaaruusi, mulopwana wala muthiyana. Pwiya, atthu aka amosa-amosa amphwanyaneya va, ohiy'ula, ahikhale vathi v'Ephome. Moota onwery'aka wuupuwela saana moolumo a atithi aka! Ni kinvekela, Muluku Ootthuneya, wira ahikhale hata mmosa onrowa opweteya. Munivahe, Pwiya. Miyo

kinniwaaminini Nyuwo vano, ni sothene sirin'aka wira kaamini-no.

¹²³ Mweette mw'axinn'aka alopwana, athiyana, apatthani aka, vaava nipuro nenla ohiy'ula ni mutelefoonini iwo. Ilapo sinci-ene siniwa, okhuma Olimani Onkhuma nsuwa mpakha Onkela nsuwa. Miyo kinnivekela, Muluku Ootthuneya, wu mothakoni wu oTucson, oCalifornia wu, oNevada wu ni Idaho, epantte Onkhuma nsuwa wu, oTexas wu; olattuliwa nno wiiraneyaka, atthu amphwanyaneya i—ikereja sikhaani, mapuro a kasolina, mmaitthokoni, yiiwaka. O Muluku, mulopwana owo orimeenle wala muthiyana, mmiravo wala mwaaruusi, okathi ula, arwe na Nyuwo. Munivahe naanaano va. Hiyo ninvekela mwa Nsina na Yesu, wira ephwanye nipuro nla noolipaneya ory'ene okathi.

Okathi, onoon'ahu yoolempwa vaxirini, elapo ekhalaka yoowuukhuwa, okathi wo woopoliwa ori vakhiviru. Epantte ya elapo ahu enoopwina, epantte ekina enoovilikeya ni enoonyaanyeya ni itetere, ntoko Yesu saahimaly'awe wira yaamukhala. Ehikhale voolekelaxa wa yaawo, Pwiya. Awo ekupali naanaano, vano hiyo ninaaruha wa Nyuwo ntoko itthuvo sa muthukuman'ola, wa Ehapari yooreera, mwa Nsina na Yesu. Amen.

¹²⁴ Munnimwaamini? Muluku ooreeriheni. Akavi anaamini wira eyo Ekeekhai, moonoo aka woothiyana, nvenxe ntata. Akavi moonoo woolopwana, nvenxe ntata. Muluku ooreeriheni. Mpakha vanoon'aka, othene. Eyo Ekeekhai, apatthani. Muluku oosuwela wira eyo ekeekhai.

¹²⁵ Vano nry'ene mwa Yoowo, ni okhala mwa Yoowo, munoophiyerya itthu sothene Owo okhwenly'awe. Nto Owo okhwenle exeeni? "Owo ohaaxeriwe mwaha wa soottheka sahu, onyakatteliwe mwaha wa sootakhala sahu; ehukhumu enniphwanyiha murettele yoomulemela Yoowo, ni makhwatta Awe t'anivoninhe." Munnaamini yeeyo? Munnaamini elivelo Awe wa ovonihwa naanaano?

¹²⁶ Aakhala anwereiwa eriyari ahu? Evenxe ntata, noolopwana wala noothiyana. Iretta sinci-ene. Nkikhanle orumaka othata eliinya. Moone, nkirina... khivanweryaneya oweliwa vaplataforma. Khiivo enamuna yo wira yeeyo.

Sookhalaniwa miteko so waavekelela aretta, mapuro makina, mukereja ni itthu siiso, otapernakulu wu.

Kinrowa wookohani etthu emosa. Ari alipa-oowaamini akavi? Nvenxe ntata nanyu. Vaareera. Kinrowa woohimeeryani Masu, okhanle Kristu. Yooruma yookiserya ya Kristu ya olumwenku, ni ya Ekereja, kiireke, Owo ohimnye ela, "Ithoonyeryo iya sinimwaatthara ale anaamini; yawiixaatherya matata aya aretta, awo anoopenuwa." Akavi anaamini wira eyo ekeekhai, Marko 16, yiire "Amen." [Muthukumano oniira, "Amen."—Mol.] Vaareera. Kinoovekelani nyuwo ntoko mulipa-

oowaamini wira mmwiixaatherye matata mutthu ori ohoolo wanyu. Mmwiixaatherye matata paahi mutthu ori ohoolo wanyu, ni nivekelelane mmosa ni mukhwa'we vano. Mmwiixaatherye matata mutthu ori vakhiviru ni nyuwo.

¹²⁷ Pwiya, ohoolo waka nookhala nivuku na maleeso, mapattuuxa a ikuwo; mai mmosa oowuuluvala ommaathale nipuro nlo, onihalela okhwa, ttuutthu onihalela okhwa, atthu anwereiwa mapuro othene. Hiyo noosoma mBibiliani wira yaanikumihwa maleeso veerutthuni va Paulo ni ikuwo, ni yaanipweheriwa aretta; vano irooho sootakhala, ni irooho soonanara, ni iretta, ni ikwerere, saanaahiya atthu. Vano, Pwiya, hiyo noosuwela wira khanihiyo Paulo Oowaarya, masi noosuwela wira Nyuwo nlelo mwa Yesu, nipuro nimoso paahi n'okokhorela-vo nivaheriwe ni Muluku. Nto vano, olelo, atthu ala aahimya waamini waya omosaru, wira annaamini siiso atthu ale yaamini aya. Vekeekhai Nyuwo muhaatthukulela ephiro! Ni miyo kiniixaatherya matat'aka maleeso ala ni ovekela wira iretta ni mixankiho sihiye irutthu s'atthu anrowa wiixaatheriwa mwa Nsina na Yesu Kristu.

¹²⁸ Vano, hiyo nihiixuttihiwa, wira okathi Isarayeli aakhum'awe wEjitu, muhina mwa muteko, awo yeetta arowaka muttethe wa natiri. Ephareya Yooxeerya yaari ohoolo waya. Nto Muluku khuweha vathi mwa Nlumi na Moor, vano ephareya yaahituthuwa, khususa, khumuhiya Isarayeli ovira arowaka muttethe wa natiri. O Muluku, nwehe vathi mwa Ephome ya Yesu, ohiy'ula, ni iretta sisuse, ni Satana oomoliwe. Ni atthu evire emurowelaka natiri ule a ekumi yooreera ni ikuru, Muluku ohimmy'awe wira, "Mwa sothene, kintthuna wira itthu sanyu sothene seetteke oratteene ni mweetteke okumi."

¹²⁹ Vano ntoko Nyuwo sinoon'anyu vo, Pwiya Yesu, matata a atthu ala vasulu va mmosa ni mukhw'awe, awo anooniherya waamini waya, wira Nyuwo moohimya, "Ithoonyeryo iya sinimwaatthara ale anrowa waamini." Awo anvekelelana mwa enamuna aya, mmosa ni mukhw'awe. Mutthu onttharelana oninvekelela mukina.

¹³⁰ Vano, Pwiya, mutharimulo ola woomaliheriwa, wira Satana, namawoka muulupale, owo khorina ehaakhi yo omuvarelela mwaana a Muluku. Owo t'okhala oxinttiwe. Yesu Kristu, nipuro nimoso paahi n'okokhorela, Nsina nimoso paahi n'ekeekhai, noomuxintta owo oKalvario. Ni hiyo ninihimya Ephome Awe naanaano va, wira Owo ooxintta khula eretta, khula ekwerere.

Ni kinniruma wira Satana akhume vamuthukumanoni va. Mwa Nsina na Yesu Kristu, aakhume atthu ala, ni awo ekhale ootaphuwa.

¹³¹ Othene anaakhela ovonihiwa waya ettharihaka Masu oolempwa, yooniherye onamoono aya evenyaka yeemele yiire,

“Vano kinnaakhela ovonihwa waka mu Nsina na Yesu Kristu.”
Nvenye mweemele.

Attotopeliwe Muluku! Eyo vo. Nkawehani va, oorakala ni
itthu anoovenya. Attotopeliwe Muluku. Ti yeeyo. Mwaamini
paahi. Owo ori vaava. Vaatepa oreera!

¹³² Vamuthukumanoni vo, vate, muliinyani mwa atelefooni,
mwaahaana woona! Kinoona wira khula mutthu va, ntoko
sinuwel’aka, wala anci-ene aya, arimweemela okathi ula.
Oh, okathi xeeni wooreerexa! Mukhalelo w’Apwiya, ti yoowo!
“Vaavo vari Mukhalelo w’Apwiya, wookhala otaphuwa,
wookhala otaphuwa.” Eroho ya Muluku enninkhaliha
ootaphuwa.

¹³³ Vano Awo anivonihaly’aya, hiyo ninnaamini. Awo aanoopola;
hiyo ninnaamini. Ale antthuna opatisiwa, etanki ti yoolikana.
Khula okathi, khula ewoora muntthun’anyu orwa, onookhala
mutthu va onrowa ocalela.

Nto vano kinoona wira, nihinatthi omaliha, naahaana
wiipa esipo emosa ya khalayi ya ekereja. “Kinnimpheenta Owo,
kinnimpheenta Owo okhala wira Owo t’opacenrye okiphenta.”
Ninvenxerye matata Muluku niipe ni murima wothene!

Nintthuna nikumane ni nyuwo va voosiisu, ewoora ya
neethanu na xexe ni minuutu miloko miraru, empa yeela, wa
mwaha wa *Othelana Ni Omwalana*. Vaareera.

Nrowe niipe vano vamosa.

Miyo kinnimpheenta Owo,

Muthukuman’ola muulupale wiipe vano! Mutelefoonini
mmo, yiipiweke, nave.

Okhala wira Owo t’opacenrye okiphenta
Nto oothuma woopowa waka
Vamwirini w’oKalvario.

¹³⁴ Yiiriwe vayi yeeyo? Vamwirini w’oKalvario. Nitthikelaka-
tho wiipa, kintthuna nvahane matata ni mutthu ori vakhiviru ni
nyuwo, mwiire, “Muluku ooreeriheni, nawetta.”

Miyo... (...?...)

Okhala wira Owo t’opacenrye...

Nto oothuma woopowa waka

Va...

¹³⁵ Oh, khamunimpheenta Yoowo? Owo kahi ooreerexa? Owo
ti Nipuro nanyu N’owiipitha-vo? Owo ti Mwala mulaponi
moowuuma, Nipuro n’owiipitha okathi wa mwanankhaya,
Nthyawelo nimoso paahi kinsuwel’aka. Tivo:

Waamini waka onweha wa Nyuwo,
 Nyuwo Mwaapwittipwitthi a oKalvario,
 Moopoli a oMuluku;
 Vano mukiiwe okathi onlomp'aka,
 Mukumihe sootheka saka sothene,
 Mukihiye okhuma nihiku nla
 Kikhale othene Awinyu!

Nrowe nivenxe matata okathi oniip'ahu yeeyo.

Waamini waka onweha wa Nyuwo,
 Nyuwo Mwaapwittipwitthi a oKalvario,
 O Moopoli a oMuluku;
 Vano mukiiwe okathi onlomp'aka,
 Mukumihe itampi saka sothene,
 Oh mukihiye okhuma nihiku nla
 Kikhale othene Awinyu!

Nrowe nuuramihe miru sahu vano niipaka muhina-muhina.

Makhalelo yakhala ooriipela,
 Vano epiphi yakirukurerya,
 Nyuwo mukhale Muhooleli aka;
 Murukunxe epiphi okhale othana,
 Muukutthe maithori ooxankiha,
 Nnakhala muhikhiye kikhumelaka
 Ottaiwene wa Nyuwo.

Muuraminheene muru, pastore ahu oophenteya, Munna
 Orman Neville, onoolaxerya muthukumano.



NIPURO N'OKOKHORELA NITHANLIWE NI MULUKU EMK65-0220

(God's Chosen Place Of Worship)

Mutthak'ola wa Munna William Marrion Branham, opaceryawene olaleeriwe ni Enkelesi Esaapatu ohiyu, mahiku yeettaka 20 mweeri wa Feveiro, 1965, Exikola Sekuntaariya y'Amiravo Parkview oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org